



2. 6. 317.

2 L. 6

XXXIV

ANDREVCCI

1733

1
DE VENERABILI
EUCHARISTIA
OPUSCULA THEOLOGICA

ANDREÆ HIERONYMI ANDREUCCI

E SOCIETATE JESU

Illustrissimo, ac Reverendissimo Dño

DOMINO

FRANCISCO MARIE
RICCARDI

PROTHONOTARIO APOSTOLICO
è numero Participantium &c.



ROMÆ, MDCCXXXIII.

Ex Typographia Antonii de Rubcis in via Seminarii Romani

SUPERIORUM PERMISSU.

of the
 of the
 of the

of the
 of the

of the
 of the

of the
 of the

of the
 of the

of the
 of the

of the
 of the

of the
 of the

of the
 of the

of the
 of the

Illūe ac Rñe Domine
DOMINE.



*A*cerdoti ad aras operanti
Oblationes fieri ex anti-
quissimo Ecclesia instituto
consuevere : Hinc rectè nos monuit apud
Gratianum Sanctissimus Pontifex Grego-
rius Septimus : Omnis Christianus procu-
ret

ret ad Missarum solemnia aliquid Deo offerre: *Cum itaque Dominatio tua Illustrissima Sacerdotii primitias divina Majestati nuper libaverit, meum esse intellexi aliquid offerre, quod novo Sacerdoti gratum acceptumque contingeret: Nec sanè deliberandum diu fuit in rei offerenda delectu: Habebam in manibus dissertationes quasdam de venerabili Eucharistia Sacramento: Has opportunissimas censui quas Tibi recenti adhuc ab immolandi initio Oblationis loco nuncuparem: Quid enim optatius aut magis accomodatum offerrem Viro ad Sacerdotale munus nuper evecto, quàm id quod ad Eucharistiam, cujus Sacerdos Administer ac Dispensator est, omni precipuo in honore habendam ac religiosissimè tractandam conducit? Sumus quippè ita à natura comparati, ut quæ ad nos attinent, ea nos magis afficiant, & ea ab aliis pluris fieri velimus, quæ à nobis pluris maximique facienda esse judicavimus. Verùm ut rem ingenuè fatear: Quod ipse tradam Oblationis nomen nequaquam implendo est: Nam ex S. Thoma 2. 2. q. 86. Oblationes de sui ratione habent;*

bent;

bent, quod voluntariè offerantur: *At me*
voluntariè, seù liberè ipse offeram facit ne-
cessitas quadam qua ad id compellor: Com-
pellit enim me, & ad observantia in te mea
vectigal offerendum adigit tum Humanitas
tua erga omnes, ac Morum Candor quo
imis aequè ac summis Te probas, tum seni-
lis in primo aetatis flore maturitas, qua ni-
hil aliud spectas, quam ut optimum Te
atque absolutissimum Rom. Ecclesia orna-
mentum, & Praesidium instituas, tum Pie-
tas in Deum singularis qua Major natu ex
nobilissima RICCARDORUM gente, in opulenta
domo, Principum gratia ac beneficentia sub-
nixamaluisse Sacris te addicere, & Deo bo-
nisque artibus vacare, quàm inter Heredi-
tarias opes, atque inter lautioris vita com-
moda Familia tua amplissima Principatum
obtinere: Accedit etiam necessitatem mihi
imponi à Majoribus tuis omni virtutum ge-
nere ornatissimis, ac plurimis maximisque
in rebus probatissimis, quos inter eminent
Illustrissimus Avus tuus FRANCISCUS MAR-
CHIO RICCARDI vir fama, & qua illam pe-
perit virtute immortalis, qui in Legatione
pro

pro Magno Ætruria Duce ad Sedem Apostolicam, aliisque publicis muneribus diligenter, magnificè, ac fideliter administrandis, nihil antiquius habuit quàm Integritatis, ac Religionis officia ut impensè obiret, & pecuniarum vim grandem in Pauperes distribueret: Hoc maximè dives, quòd suam ipse vectigalem Populo fecerit Liberalitatem: Hac quidem, Illustrissime Domine, faciunt ne voluntariè seù liberè quicquid id est ipse offeram, at nequaquam faciunt, ut coactè offeram: Etenim non modò non repugnans, sed animo libentissimo, præsertim Societatis Jesu Alumnus cum sim, Tibi obsequendi necessitati serviam: Tot enim tua ac domus tua universa in nos & in Soc. nostram extant beneficia, ut unicuique nostrum incumbat grati animi significationem sive scriptis libris, sive sermonibus, sive alio quovis observantia genere testificari: Accipe igitur, Illustrissime Prasul, dissertationes hæcæ quocumque eandem nomine appellare velis sive Oblationis, sive grati animi pro acceptis beneficiis Significationis: Illud vehementer rogo, ut me Tibi,
Gen-

Gentique tua Illustrissima obsequentissimum & fuisse semper existimes , & futurum esse cognoscas.

Romæ è Domo Profess. Soc. Jesu.

Illmæ ac Rmæ Dominationis Tuæ

Humillimus & Addictissimus Servus
Andreas Hieronymus Andreucci Soc. Jesu.

FRAN-

FRANCISCUS RETZ

Præpositus Generalis Soc. JESU.

CUM Librum, cui titulus: *De Venerabili Eucharistia Opuscula Theologica* à P. Andrea Hieronymo Andreucci nostræ Soc. Sacerdote conscriptum, aliquot ejusdem Societatis Theologi recognoverint, & in lucem edi posse probaverint, facultatem facimus, ut Typis mandetur, si iis, ad quos pertinet ita videbitur. Cujus rei gratiâ, has Literas manu nostrâ subscriptas, & Sigillo nostro munitas dedimus. Romæ xx. Februarii MDCCXXXIII.

Franciscus Retz:



IMPRIMATUR,

Si videbitur Reverendiss. P. Mag. Sac. Pal. Apostolici.
N. Baccarius Ep. Bojan. Vicegerens.

IMPRIMATUR.

Fr. Joachim Pucci Sac. Th. Mag. & Soc. Rm̃i P. Sac. Pal.
Apost. Mag. Ord. Præd.

DE

DE CULTU, ET VENERATIONE
 SANCTISSIMO
 EUCHARISTIÆ
 SACRAMENTO
 EXHIBENDA
 DISSERTATIO
*Ad maiorem Parochorum utilitatem
 edita.*



Atholica, Romanaque Fides cum nos doceat in Venerabili Eucharistiæ Sacramento illum eundem Deum præsentem esse, quem Pater æternus introducens in Orbem Terrarum, dicit : *Et adorent eum omnes Angeli Dei*; Nostrum unusquisque satis intelligit tanto huic Sacramento honorem, quammaximum esse deferendum, illudque cultu, quem vocant, latriæ ritè ut par est adorandum : Præsertim intellectum, cum firmet Tridentina Synodus Sess. 13. cap. 5., & can. 6., & manifesta ratio quam latè prosequitur Suarez de Sacram. disp. 65. sect. 1., ac Bellarminus tom. 2. Controv. lib. 4. cap. 29. prorsus idem evincat : Si quidem Deo verò debetur adoratio latriæ; Deuter. 6., & Matth. 4. *Dominum Deum tuum adorabis, & illi soli serves*: Christus autem ut est in Eucharistia,

B

sivè

sivè *in usu*, sivè *extra* est Deus verus; igitur adorandus est cultu patriæ. Ubi animadvertas non temerè à me adjectum fuisse *ly Rite* nam ita huic Sacramento cultum hujusmodi deferre nos oportet, ut non solum Christus sub speciebus existens, sed etiam *totum Sacramentum visibile* ut ex Christo, & speciebus constet, unico patriæ actu adorandum sit, & quidem non tantum *interiori*, sed etiam *exteriori*, & visibili cultu: ex Suarez. *ibid.* ac Bellarm. *ibid.* Ut verò id ab omnibus expeditè, compositèque præstetur visum est mihi nonnulla ex iis quæ Cultui erga divinam Eucharistiam conferunt, quæque eidem officiunt, paucis perstringere; etenim non levis momenti ad rem quamcumque peragendam arbitror *Servanda Vitandaque, prænoscere*: Cum autem ex Pontificiis Sanctionibus *Cap. sanè de celebr. Miss.* Ad Parochos, aliosque Ecclesiæ Præsides spectet plebem suam *frequenter* edocete cultum, ac Venerationem augustissimo huic Sacramento debitam: Videlicet, ut in eadem Sanctione, monet Honorius III., *Ne propter incuriam Sacerdotum divina Indignatio gravis exardescat*; opportunum existimavi ad Parochos opus hoc qualecumque dirigere, ut quod religiosè ipsi hætenus exequuntur, constanter urgeant, & ab hujusmodi promovenda Eucharistiæ Veneratione nunquam animum remittant: Porro rem omnem tres in partes distribuam: In I. agam de iis quæ ad Cultum Eucharistiæ *de præcepto* servanda sunt: II. de iis, quæ sunt *de præcepto* vitanda: In III. de iis quæ *de consilio & æquitate* servanda, quæque *de consilio, & æquitate* vitanda sunt.

P A R S P R I M A.

*De iis qua ad Cultum Eucharistia
de praecepto servanda sunt.*

1. **S**It Assertio: Tenemur exhibere *interdum* honorem aliquem Venerabili Sacramento, ac propterea non satis est *ex Fide* credere illud cultu, atque Adoratione latriæ dignum esse, sed insuper debemus eidem de facto Cultum huiusmodi tempore opportuno præstare: Probo hoc tum auctoritate, tum ratione; Et quidem *auctoritate* nam Eximius Doctor Suarez disp. 65. de Sac. Sect. 1. expressè asserit dari præceptum *affirmativum* exhibendi *interdum* honorem aliquem huic Sacramento, quod utpotè affirmativum licèt semper obliget, non tamen pro semper, sed tempore opportuno, additque idem Auctor non esse dubium quin tale præceptum sit nobis impositum: *Ratione* Quia hoc Sacramentum nobis datum est, ut illud tractemus, & eo utamur, ergo tractandum est pro illius Majestate, & dignitate: Majestas autem, ac dignitas ipsius non solum exigit ne unquam illi irreverentiam irrogemus sed etiam ut interdum honorem illi, & cultum exhibeamus: Hùc accedit, quòd, ut inquit Bellarminus, licèt non sit primaria ratio institutionis Sacramenti, *ut Christus ibi adoretur*; tamen etiam ista ratio quædam fuit, ut haberemus Christum magis præsentem, & ut præsentem honorarèmus: unde Eusebius Emisenus hom. 5. de Pasch. dicit institutum esse Sacramentum hoc, ut coleretur Christus jugiter per mysterium: ergo sicuti ex institutione Sacra-

menti ad finem nutriendi, & conservandi vitam spiritua-
 lem consequitur naturaliter præceptum affirmati-
 vum de sumptione Eucharistiæ: ex de Lug. de Euch.
 disp. 16. Sect. 1. aliisque, ita ex institutione Sacra-
 menti ad finem licet non primum honorandi Chri-
 stum præsentem, consequitur præceptum de exhiben-
 do interdum hujusmodi honore: Quod sanè primis
 Ecclesiæ temporibus ita Fideles observarunt; ut non
 solum ipsum Sacramentum in omni præcipuo honore
 haberent, sed teste Cardinali Baronio ad annum
 Christi 57. ipsum communem panem quia ex eo Sacra-
 mentum conficitur, aliqua honoris significatione pro-
 sequerentur: unde scripsit Tertullianus. *Calicis,
 aut panis etiam nostri aliquid decuti in terram anxie
 patimur.*

2. Dubitabis primo: An tale præceptum obliget
 etiam Infideles? R. Præmittendo aliud esse obligari
 lege, aliud à legis transgressionem excusari; quò posi-
 to: dico Infideles obligari lege seu præcepto honoran-
 di Christum in Eucharistia; nam tenentur legibus na-
 turalibus, & divinis, siquidem Deo, & rationi sub-
 duntur: Eosdem tamen excusari aliquando ex eo,
 quod *per accidens* non fuerit illis in particulari suffi-
 cienter proposita veritas Catholica: Hinc tenemur
 eos corrigere (sicuti etiam ebrios, & amentes) quan-
 do pro tempore, & loco non exhibent honoris signa
 hujus Sacramento; dummodo tamen id facere commode
 possimus, & adfit spes fructus. Ratio est quia illa hono-
 ris omissio in tali, vel tali circumstantia etiam facta ab
 Infideli, absolutè malum quoddam est, licet non im-
 putetur illi per accidens ad culpam; ergo est materia
 correctionis, & consequenter &c. Vid. Castrop. de

cor,

correct. disp. 3. par. 4. Opportune hic succurrit, quod narrat Ribera in vita S. Theresie l. 14. cap. 12. scilicet Sanctam eam foeminam quadam in Urbe cum degeret plures noctes fermè insomnes transegisse præ solitudine ne occultus aliquis infidelis ad Sacramenti locum minus reverens accederet, imò sepius è lecto surrexisse, ut si quem hujusmodi reperiret, ipsa corrigeret, & injuriam omnem à Sacramento propulsaret: Usque adeo Sanctæ Virgini infederat cura, ne quisquam ab Officio erga tam Venerabile Sacramentum discederet.

3. Dubitabis II: Quando obliget tale Præceptum seu pro quo tempore *determinato* urgeat ejus obligatio? R. designando cum Suarez disp. 65. sect. 1. duplex tempus: Aliud in *generali*: Aliud in *particulari*: Et primo quidem in *generali*: Tunc ajo urgere tale Præceptum, quando talis occurrit occasio exhibendi honorem Sacramento, ut eam prætermittere sit quidam virtualis contemptus, & moraliter existimetur irreverentia quædam, & non pura negatio, sed privatio, seu omissio honoris debiti, aut ablatio ejusdem: Explicatur hoc in exemplo Principis terreni; nam licet non teneamur *semper* illum *positive* honorare; tamen si ille nobis obviam fiat, si illum conveniamus, si alloquamur &c. tenemur ei reverentiam exhibere, ita ut omissio talis reverentiæ, meritò censeretur quædam inhonoratio: imò Lessius de just. & jur. l. 2. cap. undecim. dub. 27. putat committi contumeliam interpretativam ab eo qui aliis honorantibus Principem prætereuntem, illum sine ullo honoris signo impudenter aspiceret: Pariformiter igitur, & multo majori ratione dicendum est respectu Sacramenti; nam licet Præceptum de ipsius veneratione utpotè affirmativa

firmativum non urgeat *pro semper* tamen nefas esset eam venerationem omittere in ejusmodi opportunis circumstantiis : Adde quod si *publicè* in talibus opportunitatibus omitteretur veneratio , haberetur peccatum etiam ratione scandali : imò si frequenter id fieret suspicionem posset alicujus Infidelitatis , vel erroris generare Ex Suarez loc. cit. Deinde *in particulari* . Tunc ajo Circumstantias opportunas exigentes Sacramenti venerationem occurrere , ac propterea tunc in particulari urgere Præceptum venerationis . I. Quando accedimus ad Sacrificandum . II. Quando quis Sacram Communionem suscipere vult . III. Quando hoc Sacramentum proponitur ab Ecclesia adorandum v. g. cum elevatur in Missa &c. IV. Quandocumque Sacramentum nobis præsens sit , ut cum in publicis Processionibus per vias circumagitur , vel ad infirmos deportatur , vel in aliis similibus casibus nobis occurrit : Et quidem hæc specialiter tempora designantur non solum ex ratione quam singulis designatis temporibus annectit Suarez loc. cit. , sed etiam ex auctoritate PP. idem sentientium , ex praxi Ecclesiæ , & ex Sanctionibus Canonicis præsertim cap. sanè de celeb. Miss. aliisque juribus : unde Odo Parisiensis in Synodico Constit. cap. 5. expressè ait : *Frequenter moncantur laici , ut ubicumque viderint deferri Corpus Domini statim genua flectant , tanquam Domino Creatori suo , & junctis manibus quoadusque transferit orent* : quæ sanè monitio Deo quàm grata sit , ex eo Parochi facile colligent , quòd Angelorum exercitus in Eucharistiæ mysterio , uti testantur S. Chrysost. , & S. Greg. apud Salmeronem l. 9. tr. 2. Christo ministrant disponendo scilicet mentes hominum ad reverentiam , & sum-

summum cultum præstandum ipsi Domino in mysterio contento.

4. Dubitabis. III. *Quomodo* veneratio seu adoratio exhibenda sit Divino Sacramento? R. Supponendo ex Lessio de just. l. 1. c. 38. d. 1. Adorationem propriè nihil aliud esse, quàm *honorem externo corporis gestu exhibitum*, ut genuflexione, capitis apertione, inclinatione, corporis in terram prostratione &c. his enim, & similibus modis alios honoramus; testamur enim nostram submissionem, & alterius excellentiam: Itaque adoratio propriè in externo illo gestu, quatenus est Signum internæ æstimationis, reverentiæ, & submissionis erga alterum, & consequenter illius quoque excellentiæ: Notandum tamen est, quòd si per externam illam submissionis notam intendat quis alteri se submittere tanquam Deo, & testari ejus divinitatem erit cultus patriæ. Si intendat alteri se submittere tanquam amico Dei, erit Cultus Dulciæ &c. Unde Adoratio non solum supponit actum, & affectum internum, sed ab eodem diversificatur, & ab eodem provenit ut sit Cultus patriæ potius, quàm Dulciæ &c.

Notandum etiam est II. Quod signum externum, v. g. genuflexio habet ex duplici capite esse Signum Reverentiæ, & æstimationis internæ: I. Ex eo quòd talis nota sit vel per legem vel per consuetudinem patriæ inducta ad significandum reverentiam. II. Ex eo quòd homines hic, & nunc interpretentur ejusmodi notam seu actionem fieri ex quadam interna reverentia, & æstimatione Personæ quæ tamen interpretatio videtur inniti aliqua Patriæ consuetudine.

5. His positis ac notatis. Dico sic: Tenemur exhibere reverentiam atque adorationem Eucharistiæ

boc

hoc modo : Scilicet : honorando illam non solum Spīritu, seu interno affectu, v. g. per actus fidei divinæ, Spei, Charitatis, Pœnitentiæ &c. sed etiam externo corporis gestu aliisque Signis adhibitis ex intentione testificandi nostram submissionem Deo homini vero ibidem latenti ac præsentī : undē S. Cyril. Hier. Catech. 5. mystag. *Accede*, inquit, *pronus adorationis in modum*, & *venerationis* : Hæc autem externa signa ea esse debent quæ vel lex vel consuetudo ad reverentiæ significationem instituit, quæque Homines hic & nunc interpretantur ad reverentiæ significationem fieri : Ad cavendam verò superstitionem ; rectè monet Suarez, *publicè* servandos esse uniuscujusque Ecclesiæ usus : *secretè* verò unusquisque illis actibus uti potest, qui & nullo modo indecentes sint, & ad humilitatem, & reverentiam ostendendam, & unicuique ad devotionem excitandam accomodatū videantur : ~~Præclarum hæc in re sicut ceteris pijs in rebus nobis reliquit exemplum facile record.~~ Eminentissimus Card. Ptolemæus, qui sicut refertur in ejus Oratione funebri, *ut Sanctissimum Christi Corpus venerat de die possēt veritus ne si in Odæum diventeret molestiam domesticis afferret aliquam, genibus ante Cubiculi fenestellam positis unde in proximam adem Virginis à via dicta prospectus erat, latentem Deum adorabat ; Nunquam sand ingeniosior quam cum ita pius.*

6. Dubitabis IV. Quale peccatum sit huic præcepto affirmativo de veneratione Sacramenti non satisfacere ? R. *Per se loquendo* esse peccatum mortale : Ratio est quia omne peccatum quod est contra graves virtutes v. g. Theologicas, vel Religionis virtutem, vel justitiam, vel Charitatem proximi &c. est *per se* pecc-

peccatum mortale : ita Azor. tom. 1. lib. 4. instit. moral. cap. 9. quest. 8. Sanchez lib. 1. in decal. cap. 1. Tamburinus l. 1. cap. 1. §. 2. alique communiter : At qui non satisfacere præcepto affirmativo de Veneratione Sacramenti est peccatum contra virtutem Religionis, siquidem hæc obligatio venerandi Sacramentum nascitur ex intrinseca connexione talis actus cum honestate talis virtutis supposita institutione Sacramenti ; ergo non satisfacere tali præcepto est *per se* Peccatum mortale : Hinc gravissimè se offensum ostendit Deus in hominem qui cultum, ac venerationem ab hoc Sacramento contendebat remove ; nam Thomas Waldensis testis oculatus tom. 2. cap. 63. scribit Sartorem quemdam hæreticum publicè in Ecclesia S. Pauli Londini in judicio coram Archiepiscopo, & aliis Prælatiis constitutum dixisse, digniorem esse araneam cultu, ac reverentia, quam Eucharistiam, & continuò de alto tecti culmine horribilem araneam directo filo ad os ejus properasse, ac vix multorum manibus prohibitam ne ingrederetur : ita apud Bellarm.

7. Advertas me dixisse *Per se* esse peccatum mortale non satisfacere præcepto &c. Nam *per accidens* est dumtaxat *veniale* omittere talem venerationem ob negligentiam aliquam secluso formali contemptu, & scandalo : Ratio est quia Parvitas materiæ facit, ut talis ommissio licet de se sit gravis, tamen non semper habeat gravem deordinationem : ita Suarez de Sacr. disp. 65. sect. 1. ubi rectè addit posse dari casum ut talis ommissio nulla sit culpa v. g. si vel propter naturalem inadvertentiam, vel ob urgentem necessitatem involuntaria censeatur : At caveant Christiani ne facile

C

sibi

sibi persuadeant ibi esse *parvitatē* Materię, ubi *re-*
vera ex communi sensu timoratorum virorum adest
Gravitas, imò curent imitari nunquam satis laudatum
Sanctum Carolum, qui ut habetur lib. 8. c. 4. vit.
Nihil quod ad divinum cultum pertineret minimum
esse, aut parvi faciendum existimabat, licet illud mi-
nima à vulgo fieret, aut negligeretur.

8. Hęc quidem de præcepto naturali, ac divino
Adorationis ac Venerationis erga tam *ineffabile Sa-*
cramentum; Superest autem illud advertendum Ali-
qua esse de præcepto vel Consuetudine Ecclesię insti-
tuta quàm maximè conducentia ad reverentiam, &
Cultum tanti Sacramenti, quęque propterea omninò
servanda sunt: Hęc porrò statim subijcio. I. Admi-
rabile hoc Sacramentum asservandum est clave obser-
vatum in Sacratio cujuslibet Ecclesię parochialis sub
fidei custodia: ex Trid. sess. 13. cap. 3. & can. 7. &
in cap. *Sanè* de celeb. miss. cap. *statuimus* de *Cust. Eu-*
char. &c. Notentur ly *Clave observatum*, & ly sub *fidei*
custodia tum propter varias Constitutiones Ecclesia-
sticas, ac plura iterata Ediçta Supremę Inquisitio-
nis, tum propter Zelum quem unusquisque habere de-
bet ne Sacramento irreverentia irrogetur, qua in re
videas egregium facinus apud Famianum Strada de
Bello belgico decad. 1. l. 9., ibi enim reperies virum
qui argenteam pixidem manu elata per media Sacrile-
gorum arma asportavit, ut Sacramentum ab hæreti-
corum contumeliis vindicaret. II. Quod non nisi Sum-
mus Pontifex possit concedere licentiam asservandi hoc
Sacramentum extra Ecclesiam Parochialem, & Reli-
gioforum domum, siquidem frequenter alibi asservari
non potest ea decentia & honestate qua par est: ita ex
Castrop.

Castrop. de Sacr. tract. 21. p.^o 8. , & ex Decr. Congreg. Card. quod referunt Praxis nova Episc. 2. p. c. 3. Genuens. in praxi Archiep. Neap. cap. 92. Barbosa de pot. Episc. 2. p. allegat. 23. n. 8. &c. Hinc neque de licentia Episcopi *regulariter* potest asseruari SS. in Sacellis privatis Nobilium . An verò possit in aliquo casu Episcopus facere hanc concessionem ex recta ratione interpretante voluntatem Superioris pendet ex eo quòd benè tractat Cajet. ac Sylvester verb. *dispensatio* , & Suarez l. 6. cap. 14. de legibus : Mihi certum videtur id posse ab Episcopo concedi tum quando necessitas magna id postulet , & sit impotentia adeundi Pontificem , tum quando alicubi ea vigeat consuetudo , quæ sanè est optima legum interpretes . III. Quòd hoc ineffabile Sacram. non asservetur in Choro Monialium sed in Ecclesia exteriori : ex Decr. Concilii Trid. sess. 25. de reg. cap. 5. immò Barbosa in Collecta : 5. V. *moniales* refert Sacram Congregationem censuisse Clavem custodiæ S. Eucharistiæ non committi debere Monialibus , sed retinendam semper penes Sacerdotem ad quem spectat illam ipsis administrare : quod item notavit Tambur. d. 24. de jure Abb. q. 2. n. 5. quamvis verò non defuerit qui existimaverit non fieri contra hanc legem si Eucharistia asservetur à Monialibus tum in Ecclesia exteriori, tum simul in Choro; rectè tamen improbatur à Castropalao talis existimatio, siquidem finis intentus à Concilio videtur esse ut auferatur consuetudo asservandi Eucharistiam extra Ecclesiam , quæ consuetudo olim invaluerat apud veteres Fideles , qui Eucharistiam domi retinebant ac secum gestabant prout de S. Satyro Fratre scribit S. Ambrosius . IV. Quòd hoc Sacramentum non deferatur *publicè sine lumine* ;

mine; ita ut graviter peccarent Parochi *ex Castrop.* Si in hoc deficerent: tum quia id statuitur verbis satis gravibus, & ad finem pariter gravem augendi ex hoc apud omnes fidem, & devotionem in cap. *Sanè de celeb. Miss.* tum quia ibidem injungitur Prælati ne hujus mandati differant graviter punire transgressores *si & ipsi divinam, & Apostolicam velint effugere ultionem*: Dixi *publicè*; nam tempore pestis, & cum Infirmus longè abest ab Ecclesia, scilicet per leucam, *inquit Castropalaus*, potest deferri in sinu Sacerdotis *Secretò*: item posse in necessitate omitti gestationem, luminis docet Gobatus tract. 4. v. g. si deferenda esset Eucharistia per Urbes hæreticas: Certè S. Franciscus Salesius ut accepimus ex ejus historia, priusquam crearetur Episcopus solebat per tales Urbes deferre sacram hostiam, sub vestibus abditam, sine ulla alia exteriori cæremonia, nisi quòd majore quam aliàs gravitate, ac modestia incederet. V. Quòd hoc Sacramentum non in parietibus ut olim; sed in Tabernaculo affabrè factò; ac decenter pro facultatibus Ecclesiæ intrinsecè, & extrinsecè ornato, cum serica veste utrobique nec non cum Pyxide argentea intrinsecus inaurata, & sub se corporalem pallam benedictam habente asservetur: ita ex variis Ecclesiæ Sanctionibus apud Pacem Jordanum l. 8. tit. 3. Hinc S. Carolus ut habetur l. 8. vitæ cap. 4. severissimè præcepit ut Divina Eucharistia non in parietibus, sed in *Ara maxima* in Ecclesiis Collegiatis, Parochialibus, & Monialium custodiretur. In Cathedralibus, scilicet, non est servanda in ara maxima propter functiones Pontificales, quæ fiunt versis renibus ad Altare. VI. Quòd ante hoc divinum Sacramentum die, noctu;

noctuque sit lumen accensum : Id enim licet nullo *communi* jure scripto præceptum sit , ut inquit eruditissimus Castropalaus , tamen ex laudabili consuetudine legitimè introducta observari debet quoad fieri potest . Et quidem adeo observari debet ; ut hanc consuetudinem habere vim præcepti universalis affirmet S^a V. Eucharistia : undè nisi Paupertas Ecclesiæ Parochialis excuset *juxta Henao* peccaretur graviter ; nisi lampas accensa servaretur ob graviter culpabilem negligentiam per integrum diem , vel per aliquot integras noctes , non autem per *horam tantum* : Putat autem talis dictus Auctor dari in casu paupertatis excusationem ; quia in tali casu prævalet necessitas asservandi consecratas Hostias pro Infirmis : Hæc autem obligatio afficit Sacristas , & in eorum defectu Rectorem Ecclesiæ : Ex C. unic. de Sacrista apud Henao d. 16. contra Quintanadvenas . Qua in re optimè , atque eruditè differit Theophilus Raynaudus tract. de Euchar. cap. 5. *ad finem* : Et quidem sicuti ante arcam Testamenti semper lucebat Candelabrum *Exod. cap. 5.* , ita par est in signum venerationis , ac reverentiæ ut ante divinum hoc Sacramentum die noctuque lampas luceat : quod in Diœcesi præcepit mandavitque servari S. Carolus , & ferè in omnibus Synodicis Diœcesum constitutionibus sancitur . VII. Quod hoc Sacramentum non deferatur ad Infirmos qui nequeunt illud suscipere , saltem ut ab iis adoretur : ex prohibitione S. Pii V. , & Congreg. Concil. apud Tamb. tametsi autem Delgadillo de hac prohibitione dubitet , tamen in praxi ita servandum esse docet de Lugo l. 1. resp. moral. dub. 11. VIII. Quod hoc Sacramentum non Exponatur Venerationi publicæ in aliquibus particulis

ribus Ecclesiis v.g. Confraternitatum sine *expressa Ordinaris* licentia : ex Decret. S. C. apud Nicolium *verbo Euch.* Vide Dianam coord. tom. 6. tr. 1. ref. 31., quoad expositionem in Eccl. Regularium.

9. *Prætera ex Pace Jordano t. 1. l. 3. tit. 3. de Euchar.* tenentur Episcopi in festo Corporis Christi Solemnem Processionem ad præscriptum, & normam Cæremonialis Episcop. par. 2. cap. 33. singulis annis instituere, ac per se ipsos nisi grave ac legitimum sub- sit impedimentum Sacratissimam Hostiam manibus de- votè, ac reverenter gestare. Immo juxta citatum, Authorem opus est ut Episcopi præter Solemnem eam Processionem curent SS. Sacramentum decenter per totam Octavam publicè in Altari proponi dum Officia divina peraguntur, quibus ipsemet Episcopus, in- quit cit. Auctor, deberet interesse matutinis, ac ve- spertinis saltem horis, ut ad Pastoris *exemplum Chri- stiani omnes singulari, ac rara quâdam significatione*, gratos, & memores testentur animos erga communem Dominum, & Redemptorem pro tam ineffabili, & planè divino Beneficio, quo mortis ejus *Victoria, & triumphus representatur*, Trid. sess. 13. c. 5.

10. Res hujusmodi conducentes ad cultum SS. Sa- cramenti incredibile est quanti fecerit, & quàm stu- diosè eas servaverit Augustissima Imperatrix ELEO- NORA Neoburgica Invictissimi Regnantis Imperato- ris, Regisque Catholici CAROLI VI. Mater omni- bus prorsus virtutibus, ac præsertim pietate ornatissi- ma: Hæc quippè Princeps Fœmina magnopere cu- rabat, ut supellex omnis Sacramenti usui, ac mini- sterio destinata pretiosa esset, elegans, ac nitidissi- ma; Vidisses Reginarum, Regum, atque Imperato- rum

rum Matrem, & Conjugem jam acu pingere, jam sericis vestibus aureos, argenteosque flosculos intexere, jam linea Altarium tegumenta scitè abstergere, ac perpolire, ut Austriæ, Hungariæ, aliarumque Provinciarum Tempia haberent abundè, quæ in Eucharistiæ cultum, & ornatum conferrent, adhiberentque: Nescias tali spectaculo magis ne Cælum plauderet, an Tellus superbiret: Et hæc quidem ut suppellectili sacræ candor æquè inesset, ac nitor: Ut verò ante Divinam Eucharistiam continuò lampas lucesceret negotium dederat constitutis ad id viris ut sedulò providerent ne ardens unquam flamma deficeret: quinimo aliquarum ipsa lampadum curam ad se avocaverat: ex quo factum est, ut intempesta nocte vigilem Imperatricem clàm nonnulli intuentes conspexerint post aliquas ante Eucharistiam porrectas preces ipsam regali manu oleum lampadibus infundere, vitrum tergere, ellychnium componere, ac demum scopis pavimentum everrere: Tunc scilicet Mulierem fortem, dixeris quammaximè se probasse, cum operata consilio manuum suarum Regiam, atque Imperialem Majestatem longè infra Divinam esse, & sentiret, & demonstraret. Processioni Corporis Christi, in qua Divinum Sacramentum per vias, & loca publica circumfertur reverenter intererat pedes cereum accensum manu præferens; nec solemniori dumtaxat ejus Diei Processioni, sed omnibus, quotquot per *Octavam* circumlato Sacramento Viennæ instituebantur, supplicationibus aderat, nunquam patiens aut ceteros exemplo suo destitui: aut se tantorum bonorum, communionem fraudari. Habent Ecclesiarum Præsides in Principe *Fœmina* omnium maxima quod admirentur,

tur, habent quod imitentur : Non pigeat Episcopos, & Parochos eò contendere, quo sanctè prævit AUGUSTA. *Vid. Ceva in Vit. cap. 21.*

P A R S S E C U N D A

De iis, qua ad Cultum Eucharistia de praecepto vitanda sunt.

1. **C**asus est : Parochus cum viderit aliquos obloquentes in Ecclesia coram SS. Sacramento publicæ venerationi exposito acriter eos, ac paternè correxit enuncians ipsos Reos fore culpæ mortalis, si ita obloqui pergerent : qua correctione illi perterriti sicuti à loquutione tunc abstinuerunt ; ita deinde Theologum interrogarunt : An verè sit Reus culpæ mortalis, qui confabulatur in Ecclesia coram SS. Sacramento Venerationi exposito de rebus indifferentibus ? Queritur proindè quid respondendum sit ?

2. **R.** Pro resolutione adducam primò rationes pro parte negativa, deinde proferam quid sentiendum sit ; postremo rationibus adductis satisfaciam : Et primò quidem videtur quòd confabulari in Ecclesia coram SS. Sacramento &c. de rebus indifferentibus non sit Peccatum mortale : Ratio est I. Quia peccatum mortale non est asserendum sine gravi causa, undè Gabriel in 4. dist. 5. ar. 2. sapienter monet quòd *Theologi non debent esse faciles ad asserendum aliquas actiones, vel omissiones esse peccata mortalia* : imò S. Thom. quodlibet 9. q. 7. art. 5. ità pronunciat -- *Periculose determinatur aliquid esse peccatum mortale, nisi expressa*

pressa veritas habeatur: Præsertim cum tritum sit apud Doctores axioma Quod nulla lege statuitur id nos asserere non debemus: Ex cap. legatur 24. q. 2., & cap. 2. de transf. Episcop. Cum autem nulla lex sub gravi culpa vetet confabulationes ejusmodi coram Sanctissimo, nec expressa veritas habeatur affirmandi tales Confabulationes esse peccatum mortale, sequitur illas non esse peccatum mortale.

2. Quia sicuti ratio blasphemix, *ex Sanchez l. 1. mor. c. 32.* ita ratio irreverentiæ non est tam desumenda ex natura actionis secundum se sumpta, quam ex respectu ad Judicium commune hominum interpretantium, vel non interpretantium hic, & nunc Deum vilipendi, vel gravi contumelia affici: Cum autem actio confabulandi nec secundum se sumpta; nec secundum Judicium commune hominum habeat esse, quid graviter irreverens, & contumeliosum Deo; sequitur quod non sit graviter peccaminosa: Quin imò ex consuetudine introducta confabulandi, cum homines communiter interpretentur per eam actionem nullam fieri irreverentiam, nullum ferè ea actio erit peccatum.

3. Quia si confabulari coram SS. Sacramento esset peccatum grave, multo magis tale esset aliquid indecens *per se* agere circa hoc Sacramentum vel *immediatè* ut effundendo illud, aut projicendo in terram, vel *mediatè*, ut immundè habendo vasa, aut vestes, & res alias ad cultum hujus Sacramenti deputatas, item possent peccati argui, qui accedunt ad illud suscipiendum accincti ense: item foemina, quæ ad Eucharistiam suscipiendam accedunt sumptuosis vestibus, ac parum ad modestiam compositis: Hæc autem non

consentur esse peccata tum quia lex prohibens effusionem &c. , & immunditiam vestium &c. est lex dumtaxat poenalis , imo ejus poenæ non sunt ferè in usu , neque incurruntur ex obligatione donec à Superiore non imponantur , ut notat Suarez , tum quia Doctores v. g. Diana par. 3. tit. 2. resol. 30. &c. sequentes Joann. Sanchez ajunt esse decens quòd Equites Hierosolymitani , alique ex ordine militari accedant ad Communionem cum armis ad latus accinctis ; Tamburinus verò in tract. de Eccl. præc. cap. 10. non audet condemnare peccati eas scæminas , si ea ornamenta in tali circumstantia adhibeant absque ullo fine pravo , sed more patriæ &c. Ergo &c.

III. Nihilominus dicendum est cum distinctione : Vel enim talis confabulatio de rebus indifferentibus coram SS. Sacramento fit ex directa , ac formali intentione irreverentiæ , & ad significandum non oportere differentiam facere inter talem circumstantiam , & aliam quamcumque communem : Vel fit quasi materiali voluntate , ut sic dicam , volendo scilicet illam confabulationem , & consequenter *per se loquendo* , ac seclusa ignorantia , vel alia causa excusante , volendo quicquid est connexum cum tali confabulatione , licet id directè non intendatur .

4. Hac distinctione præmissa : Dico I. Confabulatio coram SS. facta *primo modo* , ex tali directa intentione est intrinsecè mala , & est culpa mortalis , ac gravissima : ita Suarez l. 1. de relig. lib. 3. cap. 1. , & comm. Ratio est quia quod procedit vel ex contemptu , vel ex odio ipsius Dei est peccatum semper gravissimum : Cum autem talis confabulatio facta ex tali directa intentione procederet ex contemptu Dei latentis

tis in Sacramento, sequitur &c. Hinc S. Thom. gravius, atque enormius judicat peccatum illius, qui projiceret hoc Sacramentum in lutum, quàm illius qui cum conscientia peccati mortalis ad hoc Sacramentum accedit, & rationem dat, quia ille hoc faceret *ex intentione* injuriam faciendi huic Sacramento, quod non intendit peccator indignè Corpus Christi accipiens 3. p. q. 80. art. 5.

5. Dico II. Confabulatio facta *secundo modo & sine necessitate* coram Sanctissimo Sacramento est peccatum, & habet malitiam Sacrilegii; non est tamen hæc malitia semper mortalis, sed potius frequenter est venialis nisi specialis prohibitio Ecclesiæ interveniat, & nisi sit tam longa confabulatio, tam audax, tam strepitosa, ut prudenti Judicio gravem injuriam Sacramenti continere censeatur: ita collig. ex Suarez tom. 1. l. 3. de Relig. cap. 7.

6. Prob. I. Esse *peccatum*; Nam talis actus licet *de se* non sit malus, nec sit *specialiter* prohibitus fieri coram *Sanctissimo* ex jure positivo; (in jure enim solum reperio prohibitiones generales confabulandi in loco Sacro, quæ an sint veræ, & rigorosæ prohibitiones pro omni circumstantia infra attingam num. 12.) tamen factus ex voluntate, & *sine necessitate* coram illo; continet virtuales contemptum illius, ut infra ostendam n. 8., & idè non sit sine ejus irreverentia: undè ex natura rei & independentè ab intentione operantis, atque à prohibitionè positiva Ecclesiæ, talis confabulatio est peccatum: habet verò malitiam Sacrilegii: Siquidem omnis injuria, omnis irreverentia, omnis temeratio Sacramentorum Sacrilegium est: ex comm. apud Lessium l. 2. de just. c. 45. dub. 3.

7. Confirmatur : I. *ex auctoritate* S. Thom. 1. Corinth. 2. lect. 4. exponentis verba — *Numquid domum non habetis ad manducandum* ; ubi S. Doctor ait non esse licitum domum Dei , quæ est deputata sacris usibus , communibus usibus applicare , sentitque ex natura rei , & ex ipso virtuali contemptu qui fit Ecclesiæ esse illicitum extra necessitatem in eadem communes ejusmodi actiones etiam si indifferentes exercere , ergo à fortiori erit illicitum easdem exercere in loco Sacro coram SS. Sacramento , ac proinde peccatum erit *Confabulari* &c. II. *Ex auctoritate* Suarii tom. 1. de Religione l. 3. c. 7. ubi docet quod *Omnes actiones quæ ex natura rei , vel Divina Officia de se impediunt , vel habent indecentiam in Ecclesia , habent specialem malitiam Sacrilegii si in illa fiant* : ergo eandem malitiam habebit confabulatio si extra necessitatem fiat in Ecclesia coram Sanctissimo , imò potiori jure propter circumstantiam præsentis tam Venerabilis Sacramenti .

8. Supersunt Duo enodanda ad plenam assertionis hujus probationem . I. Quare in confabulatione sic facta contineatur Virtualis contemptus ? II. Quare talis contemptus in eadem non reperiatur si fiat ex necessitate ? R. Ad I. Rationem esse quia quando actus aliquis de se non malus , tamen improporcionatus non solum *negative* , sed *positive* , & *contrarie* dignitati , ac reverentiæ debitæ alicui loco vel personæ fit coram ipsa , aut in ipso *nulla argente necessitate* ; tunc juxta naturale ac prudens judicium detegitur in tali actu quidam contemptus talis personæ , aut loci : Constat hoc ex illo Sancti Pauli 1. ad Cor. c. 11. *Aut Ecclesiam Dei contemnitis* ? Ubi Sanctus Thomas ait

ait *Contemnebant*, dum *præsente conventu Fidelium in loco sacro convivia celebrabant*: Expendas hîc convivia, & confabulationes esse quid indifferens, & differre inter se secundum plus, & minus undè &c. R. ad II. Rationem esse quia interveniente necessitate cessat juxta naturale ac prudens Judicium contemptus, & irreverentia, siquidem quod fit ex necessitate non censetur moraliter fieri ex irreverentia: Sicuti David licuit comedere panes sanctos propter necessitatem quod sine illa non liceret, etiam ex natura rei supposita sanctificatione talium panum.

9. Probo jam II. Partem assertionis, nempe, *tale peccatum frequenter esse veniale*; nec habere malitiam gravem Sacrilegii, nisi &c. Nam Toties Sacrilegium in sua ratione non est peccatum grave, quoties vel materia est parva, vel opus quod fit non habet *specialem* repugnantiam sed solum *generalem* cum sanctitate loci, & temporis, & personæ &c. vel fit ex quadam non crassa inadvertentia, & inconsideratione: ita ex Lessio de just. lib. 4. cap. 45. dub. 4. Cum autem frequenter contingat quod talis confabulatio vel sit brevis, nec valdè strepitosa, vel fiat ex quadam non crassa inadvertentia &c., & ipsa de se non habet *specialem* repugnantiam sed solum *generalem* cum reverentia debita tanto Sacramento, sequitur quòd frequenter tale peccatum confabulandi de rebus indifferentibus in Ecclesia coram SS. Sacramento sit dumtaxat veniale, & habeat venialem malitiam Sacrilegii.

10. Advertas tamen illas particulas *nisi* &c. Nam si adsit speciale præceptum Ecclesiæ constitutum v. g. in aliqua Diocesana Synodo specialiter vetans ejusmodi con-

di confabulationes; tunc faciliùs poterit esse sacrilegium grave Confabulatio coram Eucharistia facta sine necessitate etiam si fuerit brevis: Ratio est, quia tunc licet materia nudè sumpta sit levis, tamen ex gravitate finis à legislatore intenti, poterit esse gravis: ex Suarez 10. 5. de cens. disp. 4. lect. 6. quamvis non facile damnandos iudicem de peccato gravi transgredientes *rem de se levem*, tum quia illi non rarò ignorant, vel etiam credunt finem intentum à Superiore non esse magni momenti; tum quia ejusmodi præcepta gravia de rebus *secundum se levibus* nonnulli DD. putant esse tantùm comminatoria, ut videre est apud Layman de leg. c. 14.

11. Item si confabulatio sit *longa, & strepitosa* taliter, ut prudenti iudicio censeatur continere gravem injuriam Sacramenti; tunc certè erit Sacrilegium grave juxta dicta &c. Habebitur etiam annexum peccatum scandali: Imo Suarez. t. 1. de Rel. l. 3. cap. 6. putat tunc *directè* committi irreligiositatem aliam distinctam à Sacrilegio, & ejusdem rationis cum ea qua Christus Dominus in se ipso offenderetur; *concomitanter* verò committi Sacrilegium; quamvis non recedendum censeam à communi Sententia docente irreverentiam factam Eucharistiæ non habere speciem irreligiositatis, sed esse propriè Sacrilegium, ex Cajet. 2. 2. qu. 99. art. 1. Less. lib. 2. de just. cap. 45. dub. 3. aliisq. tametsi illud Sacrilegium sit in suo genere omnium gravissimum: ex Castrop. t. 3. disp. 2. de Sacril. — Hinc Illustrissimus Dei Servus Fr. Joseph à S. Maria de Sebastianis ex Ordine Carmelitarum discalceatorum Episcopus Typhernas cum quasdam Nobiles foeminas obloquentes viderit ante Divinam Eucharistiam

ristiam publicæ venerationi expositam acriter è Solio Pontificio eas reprehendit, cumque illæ vel contumaciter in incæpto persisterent, vel non statim dicto audientes fuerint; integerrimus, ac Zelantissimus Pastor pro Imperio mandavit ne impertiretur Populo innumerabili à Sacerdote angustissimum Sacramentum attollente pax, & vènia, sed confestim in Tabernaculo Divina Eucharistia clauderetur, & ea justæ indignationis specie quantæ esset in Deum offensæ ejusmodi irreverentia, patefieret in Vit. l.4. c.4. Undè primum est conjectura assequi quàm grave peccatum sit confabulationes illas coram *Venerabili* habere, quas sint fædæ, turpes, & inhonestæ: has profectò non solum coram Eucharistia, sed in templo quocumque prohibent specialiter Sacræ leges *Cap. Decet de Imm. Eccl. in 6.* ubi habetur -- *Cessent vana, & fortius fæda, & profana colloquia, cessent confabulationes quolibet*; ac propterea Suarez censet tales confabulationes, seu prava colloquia habita in Ecclesiâ quacumque non excusari à nova malitia gravi contra prohibitionem Pontificiam in *Diët. Cap. Decet*. Quia ejusmodi colloquia ibi *cum exaggeratione* prohibentur.

12. Dubitabis an sicuti confabulatio de rebus indifferentibus facta sine necessitate *coram Eucharistia* est peccatum ut diximus; ita etiam sit peccatum confabulatio facta in quovis Templo sine tali circumstantia? R. Talia colloquia non prohiberi jure positivo Ecclesiastico in *diët. Cap. Decet*, nisi habeantur illo tempore quo Divinis Officiis attendendum est, vel quo alii ad hoc ibi assistunt, qui nostris confabulationibus impediuntur: ex Suarez l.3. de Relig. c. 6. Unde colloquia facta his temporibus erunt peccatum;

con-

contra jus non solum naturale, sed etiam positivum; & quidem si fuerint tantum *otiosa*, erunt solum *veniale*, etiam prout sunt contra jus positivum: at verò extra hæc tempora erunt peccatum solum quantum ratio naturalis dictaverit ea hic, & nunc dedecere, vel non dedecere reverentiam debitam Ecclesiæ, nisi aliunde v. g. ex otiositate habeant malitiam: Admittimus autem dari casum, quo recta ratio dictet colloquia indifferentia nullatenus dedecere locum Sacrum, quia non tenemur semper esse in Templo, & uti illo ut Templum est: ex *Suarez loc. cit.*, & *Castropalao de rever. loc. Sac. disp. un. p. 4.* Contendimus verò quòd ejusmodi colloquia juxta naturalem rationem semper *extra necessitatem* dedeant reverentiam debitam Eucharistiæ expositæ venerationi publicæ, siquidem illa ad finem venerationis exposita est; hæc verò colloquia, & sunt improporcionata, & de se *impeditiva* venerationis, ideòque; *illa habere* est quidam virtualis Eucharistiæ contemptus juxta dicta, ac propterea est juxta pariter dicta peccatum habere talia colloquia in tali circumstantia.

13. III. Neque obstant *Rationes in contrarium* adductæ: Nam non obstat *prima*: Siquidem verum quidem est non esse asserendum peccatum sine gravi causa, & sine lege; at in casu adest lex, & consequenter adest ratio illud asserendi; Nam lex naturalis dictat supposita veritate hujus Sacramenti, & supposito fine venerationis ad quam illud exponitur, ne fiat aliqua actio improporcionata, & de se *impeditiva* venerationis debitæ *sine necessitate*, quæ quidem actio si fiat erit irreverentia in rem Sacratissimam, & consequenter peccatum in specie sacrilegii: Non semper

per tamen erit peccatum grave ; nam peccatum Sactilegii est quidem ex genere suo mortale , quia excellenti virtuti opponitur qualis est Religio ; *per accidens* tamen est veniale in multis casibus , si non committatur *ex formali contemptu* rei sacræ , in quo casu semper est mortale : ita Valent. 2. 2. disp. 6. Lessius l. 2. de just. cap. 45. dub. 4. Castrop. Bonacc. aliq. comm.

14. Non obstat II. Nam irreverentia dicitur inesse alicui actioni ex triplici præsertim Capite 1. Ex eo quòd sit prohibita à lege ex intentione conservandi debitum cultum , ac Venerationem rei sacræ 2. Ex eo quòd homines interpretentur exercitium ejusmodi actionis fieri ex quodam contemptu 3. Ex eo quòd talis actio ex natura sua repugnet reverentiæ debitæ rei sacræ : ita Gobat. tract. 4. cas. 23. jam verò confabulatio de rebus indifferentibus *esse de se* non repugnet reverentiæ debitæ *Sacramento* ; tamen cum aliquando prohibita sit à lege ex intentione conservandi debitum cultum rei sacræ ; ut constat *ex cap. Decet de Imm. in 6.* , cum homines interpretentur ejusmodi colloquia fieri ex quodam contemptu , seu vilipensione ; ut constat ex lege Urbanitatis , & consuetudine introducta apud Cultos Viros in circumstantia exhibendi adorationem , aut venerationem Regi ; sequitur quòd ejusmodi confabulationi insit irreverentia ; quæ quidem cum sit circa rem gravem est de se gravis : Neque valet effugium , quòd nunc *ex consuetudine* confabulandi non censeatur amplius irreverentia *Confabulari* ; nam talis consuetudo improbatur à majori , ac saniori hominum parte *ut manifestus abusus* : Dixi *Esse de se non repugnet reverentiæ debitæ Sacramento* ; Nam

E

id fa-

id faciliè non concesserim ; Siquidem confabulatio de rebus indifferentibus licèt nudè accepta non sit mala , est tamen improporcionata *Venerationi* in tali circumstantia exhibendæ Sacramento , & consequenter si fiat in tali circumstantia *sine necessitate* sapit contemptum ; undè ut circumvestita talibus circumstantiis est de se repugnans reverentiæ debitæ *Sacramento* .

15. Non obstat III. Nam Actiones indecentes *per se* , utique sunt peccatum si *mediatè* vel *immediatè* exerceanur circa hoc Sacramentum : Sic peccatum est indignè ad ipsius sumptionem accedere ; item illud aliis sumendum ministrare sine lumine accenso ; nam licèt contrarium doceat Diana p. 10. tr. 16. resol. 80. tamen jure contradicit Henao de Eucharistia quando scilicet lumen omittitur ex culpabili negligentia , ac voluntariè extra casum urgentis necessitatis , siquidem si gravis est obligatio , inquit Henao , ne desit lumen coram Eucharistia , cur eadem obligatio non , erit cum ea ministratur quippe militat potior , vel par ratio ? Item peccatum est omittere deglutire Eucharistiam à Sacerdote acceptam , vel id differre , ad tempus quo suscipiens sit extra Ecclesiam , ut docet idem Henao dis. 16. de Eucharistia : Item ne peccetur , Eucharistia quæ conservatur pro Infirmis non debet fervari per multum tempus , sed ad summum per 15. dies : ex Innoc. IV. Const. 14. *sub Catholica* : Clemens autem VIII. statuit renovandam eam esse singulis Dominicis Const. 34. *Sanctissimus*. Ad casus verò particulares in objectione allatos respondeo , & dico me nolle quidem de iis loqui , quæ ad usum Eucharistiæ pertinent , sed quoniam aliqui ejusmodi casus in objectione attinguntur , eos etiam enodabo , ac primò .

16. I. Si quis negligenter effundat Sanguinem Christi (non est enim dubium quòd qui de industria id faceret, gravissimè peccaret) non facilè excusatur ab aliqua culpa saltem veniali pro gravitate negligentiae: Quamvis verò poenae contra tales negligentes statuta in Cap. *Si per negligentiam de consecr. dist. 2.* non sint lata sed ferenda Sententiae, & jam per consuetudinem reservatum sit Ordinario ejusmodi negligentes punire, neque illi donec poena non imponatur, ullam subire poenam teneantur, nisi ad satisfaciendum Deo pro qualitate culpae, ut notat Suarez, & Castrop. ex comm. tamen non indè fit quòd per se peccatum non sit negligentiam in re tanta exercere: etenim praescindendo à gravissima quaestione inter Canonistas *An leges penales obligent in conscientia?* Certum est adesse legem naturalem id prohibentem supposita institutione Sacramenti: ut videre est apud Suarez t. 1. de Rel. lib. 3.

17. II. Vestes sacras immundas, ac sordidas ad usum & ministerium Eucharistiae tenere vetitum est pluribus Ecclesiasticis legibus; unde Gobattus ex Jordano, aliisq. ait -- *Qui praesunt Sacristiae graviter peccant, si eorum culpa fiat, ut vestes & paramenta ad usum, & ministerium Eucharistiae, sint valdè immunda:* Quando verò ea immundities tam notabilis sit, ut respectu talium Officialium sit materia peccati gravis, non potest facile decerni, sed relinquendum est prudenti judicio: Certè ex Concilio Rhemenfi apud Suarez habetur, quòd *Altaria in quibus Corpus dominicum conservatur, sanguisque ejus hauritur, mundissimis linteis, ac palliis sunt cooperienda: In Cap. autem Relinquit de Custod. Euchar. Innoc. III.*

præcipit ut Oratoria, vasa, Corporalia, & vestimenta prædicta munda, & nitida conserventur, subdens rationem: *Nimis enim, inquit, videtur absurdum in Sacris sordes negligere, quæ dedecerent etiam in prophanis*: Hinc Ecclesiarum Pastores in lustrando Diocesim id potissimum observare solent, an ea qua par est munditiæ Supellex sacra custodiatur; qua in re sicut cæteris piis in rebus præclarissima olim dedit exempla Eminentissimus Cardinalis Ursinus, deinde Benedictus XIII. P. O. M., is enim suis etiam impensis curavit; ut nitor, ac mundities in omnibus Beneventani Archiepiscopatus Ecclesiis quammaximè eluceret.

18. III. Qui accedunt ad sumptionem Eucharistiæ accincti ense, quamvis excusentur *per se loquendo* à peccato juxta Tamburinum cap. 10. de Eccl. præcept.; tamen idem Auctor ibidem putat vix fieri posse id sine peccato scandali in aliquibus regionibus; unde juxta hunc auctorem alicubi *per accidens* vix eximuntur iidem à culpa: imò quamvis Diana p. 3. tr. 2. resol. 30., & Sanchez censeant esse decens, quòd Equites S. Joann. S. Jacobi &c. accedant ad sacram Mensam accincti ense, quia arma sunt ejusmodi Ordinum insignia ad pugnandum contra Infideles; tamen hæc decencia à Tamburino tunc solum admittitur, quando tales Equites publicè in proprio Ordinis habitu ut tales communicant, non verò quando communicant *ut privati* juxta morem aliorum nobilium: Ex quo inferes ex hoc casu nihil esse contra nos.

19. IV. Mulieres; quæ ad sacram Eucharistiam accedunt ornatu tali, qui sit juxta qualitatem personæ, & juxta communem *modestum* usum, etsi melius face-

facerent accedendo ornatu dimissiori; tamen ex hoc præcisè capite non videntur peccati damnandæ; At si accedant ornatu *superfluo*, & multo magis si accedant ornatu *immodesto* non facilè possunt à peccato excusari etiam ratione irreverentiæ quæ sit Christo Domino; nam *ornatus superfluus* in Mulieribus non excusatur saltem à veniali ut docet Sanchez in Decal. lib. 1. cap. 6. Castropalaus t. 1. tr. 6. disp. 6. p. 7. Navarrus, Bonaccina alique: Ornatus verò *immodestus* difficilè vacat culpa gravi scandali: Cum autem fiat irreverentia Christo Domino, si quis ad eum accedat actualiter peccando sive *venialiter*, sive *mortaliter* hinc est quòd tales Mulieres peccant etiam ratione irreverentiæ si accedant ornatu vel *superfluo*, vel *immodesto*: Neque contrarium censet Tamburinus; nam ipse eas excusat à peccato, quando talis ornatus sit *modestus*, & quando sit juxta earum statum ac qualitatem, & consequenter non sit *superfluus*: Unde ipse omnino est in nostra Sententia, ut legenti patet: Hinc sapius Romæ plures Summi Pontifices, & præsertim Venerabilis Dei Servus Innoc. XI. mandarunt Sacerdotibus, ne panem Angelorum darent Mulieribus ad Sacram mensam accedentibus cum tali vel *superfluo*, vel *immodesto* ornamento &c. Hinc inferes consabulationes summo opere vitandas esse etiam in Processionibus Corporis Christi, quæ modestiam, ac decorum ita exigunt; ut in statu, in incessu, & in toto Corporis habitu Christiana Pietas, ac Fides elucescat: Absint hinc tumultus, contentiones, cæteraque dedecentia illos, *qui sequuntur Agnum quocumque ierit*: Insigne hac in re documentum reliquit spectatissimus Gallix Dynastes Anna Franciscus de Bovò, qui deinde Soc.

Soc. Jesu nomen dedit : Is quippè in gentilitio suæ Familiæ Oppido supplicationi Corporis Christi cum interesset à trepido repentè nuncio cognovit Hostes cuncta miscere , & evertere , pecora abigere , agros depopulari : His auditis ille pauca in rem præsentem mandans cavit diligentissimè ne rumor hujusmodi spargeretur & ne perturbatio Fidelium deducendum Eucharistiam pium agmen dissolveret : Meminerat nimirum has Processiones ea dignitate esse peragendas , ut in iis *Veritas de mendacio , & hæresi triumphum agat . Tr. sess. 13. cap. 5.* Meminerat nihil esse in iis attentandum , quod vel Eucharistiæ debitam reverentiam impediatur , vel supplicantium pietatem perturbet : Cujus rei argumento sit non deesse auctores , qui putent nefas esse Reos illos detineri , seù ad carceres duci , qui cum aliis Processioni se immiscent , & per viam Sacramentum associant : ita *Tancredi , Felix Potestas n. 623. de Im., alique* : quanquam id in jure cum non habeatur , spectanda est consuetudo , quæ meritò potuit introduci . Ita *Castrop. disp. un. p. 6. Suarez t. 1. de Rel. lib. 3. c. 9.*

20. Ex quibus omnibus , satis ut arbitror , evincitur veritas assertionis , ac resolutionis positæ ; simulque apparent graviora , aut frequentius contingentia quæ *ad cultum* Eucharistiæ de præcepto vitanda sunt : Illud ad extremum non prætermittam tanti esse , ac fieri reverentiam erga divinum Sacramentum ; ut si timor prudens adsit alicujus irreverentiæ circa ipsum , vel quia Sacramentum in manus Infidelium timeatur adventurum , vel quia ab animali ; aut igne consumendum , vel ab aliquo alio irreverenter tractandum sit ; possit non solum Sacerdos , sed etiam eo deficiente

Lai-

Laicus non jejunos illud sibi propriis manibus ministrare : Sic ex comm. docet Vasquez disp. 211. c. 15. Layman 1. 5. Summæ tr. 4. cap. 6. &c.

P A R S III.

De iis quæ ad Cultum Eucharistiæ de consilio servanda, vitandæ sunt.

1. **A**liqua dumtaxat persequar; nam *de consilio* optima quæque, exquisitissima, & innumera prorsus servanda essent ad cultum Eucharistiæ, nec tamen debito satisfaceret; unde ritè canit Ecclesiæ *Quantum potes, tantum aude, quia major omni laude, nec laudare sufficis*: Dico igitur primò consilium pium est, ut unusquisque curet quoad fieri potest ne dies sibi elabatur, quo divinam Eucharistiam in Ecclesiâ non adoraverit: Nam si Regina Saba à remotis partibus venit Jerosolyman, ut Regem Salomonem cognosceret, & honoraret; quanto magis debemus nos Ecclesiâ aliquam adire, ut ibi latentem Servatorem, ac Dominum veneremur? *Nonne plusquam Salomon hic?* Certè id gratissimum esse Christo Domino constat ex Vita S. Mariæ Magdalenæ de Pazzis, cui ipse Dominus præcepit, ut per 30. vices in singulos dies Sacramentum in Ecclesiâ adoraret: Accedit hùc *Honestas* magna hujus actionis; nam si Rex aliquis clementissimus, ac beneficentissimus se suis subditis sisteret ut ab iis honoraretur, & in publica, ac maxima Regalis sui Palatii Aula debitum honoris Vectigal ab iisdem expectaret;

staret; quis rogo esset tam inurbanus ut officium hoc declinaret? Quis unquam suas esse partes non intelligeret eò se conferre semel, iterum, ac tertio; dummodo liber pateret aditus, ut Regem omni prorsus observantiæ genere prosequeretur? Atqui planè sumus in casu: Adest nempe in Ecclesia Christus Dominus Reparator optimus idem qui pro nobis Jerosolymis passus est, idem qui factus est pro nobis obediens usque ad mortem; idem qui interpellat pro nobis ad Patrem; & quisquam erit qui solum illum relinquit, ac plures elabi dies permittat quibus eum non vilitet atque adoret? Refert Historia Vitæ Joannis de Avila, c. 15. quemdam ex ipsius discipulis dixisse sapientissimo Doctore: *Utinam nobis liceret vivere, ac mori in Palestina, ubi tot insignia extant monumenta Vitæ, ac Passionis Christi Domini!* Cui pius Doctor opportunè teposuit *Nunquid non habemus apud nos Sanctissimum Sacramentum? Equidem hujus cum recorder, nihil aliud prorsus desidero:* Et sanè non est cur desideremus locum, aut tempora; cum in nostra Urbe, & nostris temporibus Christum habeamus, quem præsentem adoremus, quem præsentem alloquāmur, & à quo abundantioris gratiæ divitias reportemus: Hæc liquidem est tertia ratio, cur tantum Sacramentum semel in die saltem veneremur, nempe *Utilitas* quæ indè in nos derivatur, quæ quidem tanta est, quanta esse dicitur accedenti tum fiducia ad thronum gratiæ: Propterea Sancti Dei in id quammaximè incubuere; ut frequenter quoad fieri posset huic Divino Sacramento Venerabundos se sisterent: S. Thomas Aquinas plurimis licèt distentis studiorum occupationibus quinquies in dies Ecclesiam adibat, ut Eucharistiam cole-

toleret : S. Franciscus Borgia quotidianæ hujus Sacramenti adorationi aded erat deditus , ut illud , ubi asservaretur , instinctu cœlesti sentiret : Venerabilis P. Ludovicus de Ponte Societatis Jesu non solum magnam diei partem , sed integras interdum noctes vigil , & orans apud SS. Sacramentum agebat ; atque hinc opinor eas mentis illustrationes impetravit , quibus cœlestis Sapientiæ refertissimos libros edidit , & absolutissimæ virtutis exempla reliquit : Utinam Sanctos hos Viros aliosque imitemur in Cultu Venerabilis Sacramenti !

2. Præterea opportunissimum est , ut quando casu aliquo graviter affligimur , quando injuriæ nobis irrogantur , non statim ab amicis levamen efflagitemus , aut de illatis injuriis apud illos conqueramur ; nam juxta S. Francisci Salesii Sententiam l. 3. Introd. cap. 3. *certum est , ut plurimum peccare eum , qui de injuriis conqueritur* : Sed illicò ad Sanctissimum Sacramentum confugiamus , & ab eodem consilium , vires , atque opem imploremus juxta Domini vocem *Venite ad me omnes , qui laboratis , & onerati estis* : Enim verò benignissimus ipse Dominus nos reficiet , ipse dabit auxilium in tempore opportuno . Locupletissimum hac in re testimonium fert S. Gregorius Nazianzenus in Orat. undec. in laudem S. Gorgoniæ : Hujus S. Doctoris ipsissima verba exscribam . *Adversa corporis valetudine tenebatur* (soror videlicet Gorgonia) *graviterque laborabat , eratque insolens quoddam & prodigiosum morbi genus &c.* Desperatis omnibus auxiliis ad Mortalium omnium Medicum confugit , atque intempesta nocte captata , cum morbus nonnihil remisisset , ad Altare cum fide procumbit , eumque qui

F super

super ipso honoratur, cum ingenti clamore invocans, omnibusque nominibus appellans, atque omnia ea, quæ unquam Dominus mirificè gesserat, velut in memoriam ei revocans, tandem pia, & præclara quædam impudentia effertur: Eam quæ Christi simbria Sanguinis profluvium compresserat, imitatur: Quidque fecerit, audite: Cum caput suum pari cum clamore, lacrymisque (mulierculæ illius instar, quæ olim Christi pedes rigavit) altari admovisset, nec se prius illud dimissuram esse denuntiasset, quàm sanitatem obtinisset &c. O rem admirandam! Statim liberatam se morbo sentit, & corpore, & animo, & mente levius discedit, pro spei mercede id quod speraverat consecuta, & per animæ robur, corporis robur accipiens.

3. Dico II. Optimum Consilium est; ut omnes; ac præsertim è primaria Nobilitate Viri divinum Sacramentum comitentur, quando ipsum ad Infirmos deferitur: Decet enim quammaximè Nobiles viros qui à Deo inter cæteros peculiari beneficentia distincti sunt; singulari erga ipsum Deum observantia & reverentia excellere: Præsertim cum eorum pia facta plurimum valeant ad excitandam in Plebe pietatem ac devotionem: Reges ipsi profectò, ac specialiter Austriaci sæpius exemplo, ac legibus consilium hujusmodi firmarunt: Summi Pontifices divitias ingentes ex Ecclesiæ thesauro erogarunt, ut omnes ad idem faciendum suaviter impellerent, quos inter novissimè Innocentius XII. concessit Indulgentiam 5. annorum, & 5. Quadragenarum comitantibus Sacrum Viaticum: Sex verò, si cum luminaribus id præstetur. Deus autem tam gratum id sibi esse non semel ostendit; ut Rodulpho

pho Austriaco; atque Augustissimæ ejusdem Genti colatum idcirco Imperiale Diadema à Datore bonorum omnium, jure quamplures censeant, ac referant Historici: Immò, ut credere est, miraculo celeberrimo olim Deus testatus est, quàm grata sibi esset hæc observantia: Nam Ulissippone in Lusitaniæ Principe Civitate *Canis* quidam, ac si esset ratione præditus semper Divinum Sacramentum comitabatur quoties ipsum ad Infirmos deferretur: Si fortè dato æris Campani signo clausum domus Ostium reperiret; tandiù Dominum urgebat, donec exeundi, ac suo muneri satisfaciendi copia fieret: Si non ità rectè ritèque esset Processio disposita; ipse huc illuc discurrens videbatur eniti, ut ad justi Ordinis normam componeretur: Si quem vidisset tunc temporis aut oscitantem, aut dormientem, aut equitantem, ipse hominem aggredebatur, ac latratibus eundem compellebat ad debitam Sacramento reverentiam exhibendam; nec ulla unquam vi, aut ratione à tam pio Officio deduci, aut impediri potuit. Vid. Joan. Eusebium l. 9. c. 94. Historiæ natur.: Homines ab ipsis Brutis officium discant.

4. Dico III. Consilium etiam est. I. Ne Mulierculis detur eleemosina cum hoc onere, ut pro hoc, vel illo communicent: Nam omissa quæstione an communio utiliter applicetur sive pro Vivis, sive pro Defunctis; de qua latè Raynaudus in opusc., & in qua certum videtur Communionem *ut est opus operatum* non posse pro aliis cum eorum utilitate applicari, posse tamen *ut est opus operantis*: omissa inquam hac quæstione Erogatio ità onerata eleemosinæ non rarè fovet Muliercularum vanitatem, quæ in Sanctarum

numero sic putant se haberi : fovet earumdem pigritiem quæ à domesticis debitis laboribus abstinere , cum majus è re sacra lucrum se reportare cognoscant ? demum exponit periculo irreverentiæ divinum Sacramentum , quippè vel indispositæ vel exigua prorsus dispositione ejusmodi Mulierculæ non rarò accedunt ad Sacram Mensam , ut eleemosinæ lucrum faciant : Propterea auctor omnibus sum ut fiat quidem eleemosina ejusmodi Mulierculis sed *sine tali onere* : Idem prorsus censet Calinus *in cap. 7. l. 1. Reg.* , & meritò .

II. Viderint illi ad quos spectat , ac seriò considerent an expediat frequens admodum divinæ Eucharistiæ expositio , præsertim tenui apparatu , ac raris luminibus : Certè Raynaudus tom. 15. ait : *posita ea frequentia exponendi divinam Eucharistiam non modo timendum esse ne mortales obvia quæque fastidire soliti , tantum Sacramentum minoris æstiment ; sed etiam ne in gravi quapiam , & insolita occasione , deficiat modus permovendi Populum , ac excitandi ad sensum pietatis necessitati congruentem , v. g. si ingruat pestis , aut incurfus Hostium , nihil habet Ecclesia aptius ad plebem fidelem excitandam quàm sacrum spectaculum Corporis Christi propalam exhibiti &c. At hoc ipsum augustissimum spectaculum , si frequens sit , & passim exhibeatur , minus movet quia ab assuetis non sit passio .* Hactenus citatus Auctor : Equidem censeo exponendam divinam Eucharistiam eo luminum numero quem præscribunt Decreta Congreg. , præterea eo apparatu , & assistentium Clericorum cultu , qui tantam decet Majestatem : si autem alicubi id fieri nequeat , fortassè magis erit expediens ne ibi publicè exponatur : Vide Pac. Jord. tom. 1. lib. 3. tit. 3. de Euch. , & Romanas Ordines

Ordinationes in instructione Orationis 40. horarum : —
 Profectò cum Romæ anno 1593., sub Clemente VIII.
 vel initium , vel incrementum habuerit Oratio 40.
 horarum ante expositum divinum Sacramentum ; pre-
 candi constantia , modestia , silentium , ac teneræ
 Pietatis ardor in omnium extans ore , satis indica-
 runt quam vim habeat luminum , ornamentorum , &
 apparatus species ad permovendos animos , atque ad
 fidem , erga tantum Sacramentum excitandam ; ex
 quo pronum est unicuique conjicere ferventiori Eucha-
 ristia cultui non admodum consulere , qui raris arden-
 tibus facibus , ac tenui ornamentorum , & apparatus
 dignitate illam venerationi proponunt : Intellexit
 enimvero id spectatæ Sanctitatis Foemina B. Hyacinti-
 ta de Mariscottis Religiosa Prof. S. Francisci , quæ
 Viterbii geniales ante quadragenarium Jejunium dies
 ad pietatem ut componeret , dabat quidem operam ut
 in variis ejus Urbis Templis *Sacramentum* exponere-
 tur , ea tamen magnificentia , ac tanta lampadum ,
 cereorumque copia , Viris piis impensam prolixè con-
 ferentibus , ut splendor ingens exquisitæ pompæ sa-
 crum quemdam horrorem perfunderet , & hominum
 animos in Dei cogitationem , amoremque suavissimè
 raperet : Ut verò obstrueretur os loquentium iniqua ,
 confestim mirabili providentia apparuit quantam inde
 iniverit ipsa apud Deum gratiam ; nam quodam die
 oleum cum penitus defecisset , quo ardentes tot lychni
 flammam nutrent , insperato subsidio præsentī ege-
 statī peropportunè subventum est : Siquidem ad Crates
 accita præter expectationem Hyacinta Vas prægrande
 oleo plenum reperit , quo satis superque magnificen-
 tissimæ expositioni prospexit : Audiant hæc Ecclesia-
 rum

rum Præsides, & meminerint Deum nullius egentem rei voluisse *Propitiatorium de auro mundissimo*, fortasse ut ipsi cognoscant quam ingenti splendore velit populo exhiberi illum, quem *proposuit propitiationem, per fidem in sanguine ipsius*, nec paupertatem excusent; nam Religiosa Fœmina erat pauperrima, deinde arguet Augustinus per hæc verba *multa superflua habemus, si non nisi necessaria teneamus: nam si inania quæramus, nihil sufficit*. Adde quòd apud omnes, sed præsertim apud Ecclesiarum Præsides pro comperito illud esse debet, nempe *Recipi cum sanore quicquid in Deum erogatur*.

5. Ad extremum vitandus est abusus, qui irrepsit apud nonnullos quoad *Benedictionem* Sanctissimi nam solliciti quidem sunt non pauci, ut Ecclesiam adeant ad recipiendam, ut ajunt, Sanctissimi *Benedictionem*, quæ nimirum brevi tempore absolvitur, nihil aut parum penalitatis importat: At nunquam fermè eosdem videris in Ecclesia prolixiùs orantes, vel pias cohortationes audientes, vel peccatorum sordes per Pœnitentiæ Sacramentum expiantes: Profectò laudandi sunt ejusmodi homines in eo, quòd *Benedictioni* Sacramenti dum intersunt actum Fidei, ac Religionis exercent; at reprehendendi sunt in eo quòd cætera Christianæ pietatis opera negligant, putentque Deo satis & conscientiæ secisse variis cum interfuerint *Benedictionibus* non intelligentes quòd ut descendat super nos *Benedictio* Dei, debet à nobis ea conditio adimpleri sub qua illam Israelitis promisit Moyses Deuter. 28. nempe, *Si audieris vocem Domini Dei tui, ut facias, atque custodias omnia mandata ejus &c. Benedictus tu in Civitate, & Benedictus in agro &c.* Intel-

ligant

ligant igitur universi primùm nobis incumbere *Custodire mandata Dei* in purgandis animæ sordibus, in recipiendis Sacramentis, in addiscendis scitu necessariis ad salutem, in satisfaciendo per eleemosinam, & jejunium pro peccatis commissis, in orando Deum humiliter, ac perseveranter &c. Deinde his ritè peractis descendet super nos Dei *Benedictio*, ad quam impetrandam plurimum sanè valet precatio Sacerdotis attollentis *Venerabile Sacramentum*, ut constat ex eo, quòd hæc sit in genere Sacramentalium, & ex eo quòd benedictio Sacerdotis novi Testamenti juxta Cornelium à Lapide in cap. 6. Num. efficaciam quamdam habeat; unde à Sanctis Patribus, & Anachoretis olim Christiani etiam Principes benedictionem postulabant, magnumque ejus fructum experiebantur: Ex Cornelio à Lapide ibidem. Dubitabit hic aliquis an etiam cavendum sit, ne quis *Benedictioni* Sacramenti ex *quadam solum consuetudine* intersit, sicuti etiam ne quis *ob consuetudinem* solum illud visitet, vel suscipiat? R. Facere ista circa Sacramentum *ob consuetudinem* solum dupliciter potest contingere: *Primò* excludendo *positive* alios fines v. g. si visitans Sacramentum diceret — Ideo hoc facio, ut meæ satisfaciám propensione, non autem quia hoc est opus virtutis, imò non omitterem hoc facere, etiamsi id esset vitium cum nihil aliud spectem quàm mihi indulgere — *Secundò* habendo *se negative* circa alios fines v. g. si visitans Sacramentum aggrediatur tale opus promptè ob consuetudinem, virtualiter dumtaxat non autem actualiter reputans apud se reverentiam, & cultum exhibendum Sacramento quamvis à volitione talis reverentiæ, ac talis cultus Ortum habuerit ea consuetudo: Jam verò si com-

commorati actūs exerceantur circa Sacramentum *priori modo*; utique erunt peccatum, & consequenter cavendum est ne sic operemur *ob consuetudinem*: Si autem exerceantur *secundo modo*; utique tales actūs erunt laudabiles quamvis laudabilius esset eos exercere ob reverentiam Sacramenti *actualiter cognitam*; consequenter cavendum erit à faciendo tales actūs *ob consuetudinem* ea dumtaxat ratione qua cavendum est ne fiat opus bonum sine actuali devotione: Neque obstat, quòd Animarum Moderatores reprehendant ejusmodi opera fieri *ob consuetudinem*; nam oportet eorum reprehensiones in *sano sensu* accipere; liquidem ipsi reprehendunt id tanquam quid minus perfectum, aut reprehendunt eos, qui talia peragunt cum *voluntaria inconsideratione*, non autem simpliciter reprehendunt eos, qui illa peragunt *involuntaria inconsideratione* ducti quodam habitu, & consuetudine idem peragendi: Et in *hoc sano sensu* intelligendus est S. Chrysostomus reprehendens hom. 61. suscipientes Eucharistiam *ob consuetudinem*, dicens: *Multos video Dominici Corporis participationem temerè sumentes, ut à casu, & consuetudine potius quàm cogitatione & mente: O consuetudinem! O presumptionem!* Et S. Bonavent. de præp. ad Missam cap. 8. *Vide quod desideres, ne propter vanam gloriam, aut consuetudinem accedas.* Ita Sanchez de Sacr. disp. 24. Suarez de Euch. disp. 1. sect. 4. n. 8.

Utinam hæc dixisse ad laudem & gloriam Sanctissimi Sacramenti, & ad Animarum bonum, sit mihi meritum ad vitam æternam, & aliqua satisfactio pro irreverentia, qua toties ad Altare Dei Sacerdos indignus accessi!

F I N I S.

IN-



I N D E X

QUÆSTIONUM, ET RESOLUTIONUM

DISSERTATIO I.

D E Cultu & veneratione venerabili Eucharistiæ exhibenda.	pag. 9.
Sacramentum Eucharistiæ adorandum est cultu latræ.	10.
Tenemur interdum exhibere honorem aliquem Sanctissimo Sa- cramento.	11.
Datur præceptum affirmativum obligans semper sed non pro se- per ad exhibendam venerationem SS. Sacramento.	ibid.
An tale præceptum obliget Infideles.	12.
Quando & Quomodo adimplendum sit tale Præceptum.	13. 15.
Quanam sint de præcepto vel consuetudine Ecclesiæ constituta ad Cultum Eucharistiæ.	18.
An possit Sacramentum deferri ad Infirmos, qui nequeunt illud suscipere ut saltem ab iis adoratur?	21.
An possit publica venerationi exponi sine licentia Ordinarii.	22.
Quanti fecerit res pertinentes ad Cultum Eucharistiæ Augustis- sima Imperatrix Eleonora.	ibid.
An sit peccatum & quale confabulari de rebus indifferentibus co- ram Sacramento venerationi exposito.	24.
An sit peccatum, quale, & quando confabulari in Ecclesia.	31.
An liceat ministrare Eucharistiam sine lumine.	34.
An Supellex sacra debeat de præcepto esse munda.	35.
An Equites ex ordine militari decenter accedant ad Eucharis- tiam accincti ense.	36.
An peccent sæminæ accedentes ad Eucharistiam cum ornatu su- persuivo vel immodesto.	ibid.
An	

- An Ritus Processioni Corporis Christi se immiscens gaudeat immunitate.* 38.
- Visitatio, & Adoratio quotidiana Eucharistiae quantifacienda.* 39.
- Deducere Sacramentum cum deferatur ad Infirmos pium valde ac salubre est.* 42. & seq.
- Dare eleemosynam Mulierculis cum onere ut communicent non est expediens.* 43.
- Expositio Sacramenti valde frequens an expediens.* 44.
- Benedictioni Sacramenti interessentium utilitas, & nonnullorum quoque hoc abusus.* 46.
- An facere aliqua ad Cultum Sacramenti ob consuetudinem sit laudabile.* 47.

DE SACROSANCTÆ USU
EUCHARISTIÆ

Crebriùs, aut rariùs Laicis concedendo

*Juxta Decretum Sacra Congr. Concilii Trid.
interpretum editum anno MDCLXXIX.
annuente Innocentio XI.*

DISSERTATIO

HABITA OLIM SUB AUSPICIIS

Eminentissimi, ac Reverendissimi

CARDINALIS GIUDICE

*Tunc Episcopi Tusculani, Montis Regalis Archi-
episcopi, ac deindè Episcopi Ostiensis, &
Sacri Collegii Decani &c.*

A B

ANDREA HIERONYMO ANDREUCCI

E SOCIETATE JESU.



ROMÆ, Typis Antonii de Rubeis in via Seminarii Romani,
MDCCXXXIII.

SUPERIORVM PERMISSV.

THE UNIVERSITY OF CHICAGO

PHYSICS DEPARTMENT

MICHAEL ANGELUS TAMBURINUS

Præpositus Generalis Societatis Jesu.

CUM Librum, cui titulus: *Dissertatio de usu Sacrosanctæ Eucharistiæ crebrius, aut rariùs Laicis concedendo*: à P. Andrea Hieronymo Andreucci nostræ Societatis Sacerdote conscriptum, aliquot ejusdem Societatis Theologi recognoverint; & in lucem edi posse probaverint; facultatem facimus, ut Typis mandetur; Si iis, ad quos pertinet ita videbitur. Cujus rei gratiâ, has Literas manu nostrâ subscriptas, & Sigillo nostro munitas dedimus. Romæ 5. Octobris 1723.

Michael Angelus Tamburinus.

IMPRIMATUR,

Si videbitur Reverendiss. P. Mag. Sac. Pal. Apost.

N. Episc. Bojanen. Vicefg.

DE mandato Reverendissimi P. Gregorii Selleri Sacri Pal. Apost. Mag. Opusculum, cui Titulus: *De Sacrosanctæ usque Eucharistiæ crebrius, aut rariùs Laicis concedendo*: Auctore P. Andrea Hieronymo Andreucci Soc. Jesu magno cum emolumento tenuitatis meæ perlegi, & attentè consideravi; cumque nihil in eo repererim, quod veræ perfectionis Christianæ normam non præferat: ad publicam utilitatem Typis mandari posse jure merito existimo. In quorum fidem me subscripsi die 9. Octobris 1723.

F. Eustachius à S. Maria Carmelita discalceat.

& Sac. Theol. Prof. Def. Provinc.

Idem sentio Ego Nicolaus Anton. Canon. Cuggiò Sacr. Congreg. Indicis Consult.

IMPRIMATUR.

F. Gregorius Selleri Ord. Præd. Sac. Pal. Apost. Magister.

A 2

IM-

IMPRIMATUR,

Si videbitur Reverendiss. P. Mag. Sac. Pal. Apost.

N. Baccarius Episc. Bojan. Vicefg.



Dissertationem de *Sacrofancta usu Eucharistia crebrius, aut rariis laicis concedendo* à P. Andrea Hieronymo Andreucci Soc. Jesu elaboratam attentè perlegi; & quia nihil in ea inveni, quod sanæ doctrinæ opponatur; ideo posse Typis mandari censeo. Dat. Romæ in Collegio Pœnitentiariæ Sanctæ Mariæ Majoris de Urbe 16. Novembris 1729.

Fr. Paulus Thomas de Cugna Ordinis Prædicatorum Sac. Theologia Magister, & Pœnitentiarius.



IMPRIMATUR.

Fr. Jo. Benedictus Zuanelli Ord. Prædic. Sac. Pal. Apost. Magister.

DIS

DISSERTATIO


*De Sacrosancta usu. Eucharistia Laicis
concedendo.*

P A R S I.

Quale sit, & quid statuatur Decret. Sac. Congr.
Conc. Trid. Interpretum, hac de re
editum Anno 1679.

ANNUNTIANTE INNOCENTIO XI. P. M.

§. I.

1.  Arò admodum contingit, ut
succrescente Domini messe ini-
micus homo non superfeminet
zizania: Hinc superioribus tem-
poribus divinæ Eucharistiæ usus
frequentior cum fuerit revoca-
tus, eò processit nonnullorum
tum nimius Fervor, tum nimia

Rigiditas respectivè, ut alii pro quotidiana danda
Laicis communionem mordicè stantes prudentiæ Chri-
stianæ justique temperamenti limites *verbis* ac *re* tran-
siverint: Alii ex opposito contrarium sentientes,
dum adversarios arguunt, à debita moderationis re-
cto tramite aberraverint.

2. Et quidem, qui stabant pro quotidiana Com-
munionem *verbis* primo lapsi sunt; etenim asseruerunt:
1. Communionem quotidianam esse præceptam de jure
divino: 2. Sufficere pro debita, & congrua disposi-
tione

tione ad talem quotidianam divini cibi usurpationem esse in statu gratiæ, seu carere peccato mortali: 3. Frequentem Confessionem, & Communionem, etiam in his qui gentilitate vivunt esse notam Prædeterminationis: 4. Non esse expectandum hac in parte Judicium Confessarii, sed eo ipso, quod absolutionem à mortalibus obtinuerit, posse quemlibet uti jure suo, & invito etiam, ac dissuadente Confessario ad Communionem accedere.

3. *Factis* porro non minus imprudentibus iidem errarunt nam 1. Cubantes in lecto, & non laborantes ulla gravi Infirmitatis nota sumebant Sacramentum Eucharistiæ: 2. Sacerdotes seculares, aut Regulares deferebant ad privatas domos vel secretò, vel argentea theca inclusum in crumena divinum Sacramentum: 3. Communicabant nonnulli Fer. 6. in Parasceve: 4. Accipiebant in Communione plures particulas, aut grandiores solito: 5. Consistebantur peccata venialia, simplici Sacerdoti non approbato ab Episcopo, vel Ordinario, fortassè ut scrupulosiores præmitterent hanc qualemcumque præparationem quotidianæ Communioni. -- Huc usque processerat discretionis fræno soluta Devotio.

4. Qui autem nimium horum Hominum Fervorem improbabant, etiam ipsi medium non tenuere, sed à ratione *verbis*, ac factis aberrarunt: Nam asseruerunt 1. Quotidianam Communionem universim, & absolute esse omnibus laicis interdiciendam, præsertim verò Negotiatoribus, & conjugatis; 2. Statuendos esse certos dies, quibus generaliter singulis mensibus, aut hebdomadis percipienda esset à Negotiatoribus Sacra Eucharistia, vel ab eadem abstinendum, 3. Non

3. Non permittendum esse Sacris Montalibus, ut quotidie cœlesti epulo se reficiant. 4. Horum nonnulli Bajanis erroribus adhærentes censuere arcendos esse, à Sacra Communione, quibus nondum inest Amor Dei purissimus; & omnis mixtionis experti — Demùm, ut verbis facta responderent variis impropriis modis repellebant Fideles à Frequenti, & quotidiana Communionem v. g. nolendo eorum Confessiones audire, præcipiendo universim ne ita fieret, notam temeritatis, ac levitatis illis inurendo &c.

§. I I.

5. **P**rovidè his malis, & contentionibus occurrerunt Ecclesiæ Pastores per sua Decreta, & Statuta, ac præsertim occurrit Summus Pastor Christi Vicarius, qui aliquas ex enumeratis assertionibus damnavit, uti præstitit Inn. XI. prop. 56. & Alex. VIII. prop. 23. Insuper Sacra Card. Congreg. anno 1587. decrevit perniciosas esse prohibitiones generales, de quotidiana Communione, & obstat Decretum Tridentini Episcopo volenti præscribere certa tempora, ut dies dominicos, 4. & 6. Feriam, quibus tantùm liceat viris Laicis Sanctissimam Eucharistiam Sumere: Novissimè verò, nempe anno 1679., eadem Sacra Congregatio annuente Innoc. XI. edidit sapientissimum Decretum, quo coercuit tum nimium Fervidos, tum nimium Rigidos in ordine ad concedendam Laicis Communionem quotidianam, & abusus, qui ex utraque dissidentium parte irrepsierant interdixit atque ex se penitùs per suam legem amovit.

6. Decretum itaque hoc, de quo meminimus, pas-

passim circumfettur impressum in recentioribus moralistarum libris, ut apud la Croix l. 6. p. 1. n. 665. apud Vivam in expos. prop. 56. Inn. XI. apud Felicem Potestatem in tract. de Euch. & apud alios: Illud verò fusè, solidèque explicat Cardenas in sua prima Crisi p. 3. disp. 66. cap. 1. Equidem ne longus sim: Summam illius tradam duas in partes distributam, quarum altera exhibebit hujus decreti leges, quæ nimium rigidos, & dissidentes à quotidiana Communionem compescunt, altera præferet leges, quibus nimium fervidi, & stantes pro quotidiana Communionem temperantur.

7. Et primum leges compescentes nimium Rigidos sunt hujusmodi -- *Communione quotidianam non esse universim prohibendam, imò usum quotidianum divine Eucharistia ex se laudabilem esse, illumque adhibito judicii, ac prudentia temperamento ubi viget alendum: 2. Non esse generaliter statuendos dies in singulis hebdomadis, vel singulis mensibus, quibus dumtaxat liceat Laicis negotiatoribus, vel Conjugatis ad Sacram mensam accedere, cujus rei optima innuitur ratio, quia homines haud norunt conscientiarum recessus, ac dona gratia, quibusdam personis collata ob quæ alii frequentiori, alii minus frequenti Communionem sunt reficiendi. 3. Parochorum, & Confessariorum iudicio relinquendum esse, ut ipsi qui secreta cordium explorant crebrius, aut rarius unumquemlibet ad Communionem admittant, prout in unoquoque cognoverint conscientia puritatem, frequentia fructum, & ad Pietatem processum: 4. Providendum esse à Sacris Pastoribus, ut nemo à sacro convivio si-
ve frequenter, si-ve quotidie accesserit, repellatur --*

S. Mo.

5. *Moniales petentes quotidianam Communionem primum admonendas esse, ut diebus præscriptis à suo instituto communicent, deinde permittendam Communionem quotidianam illis ex monialibus, quæ fervore spiritus incaluerint, & quotidiana se dignas communionem præstiterint* — Haftenus leges compescentes nimium rigidos.

8. *Leges temperantes nimium fervidos sunt subsequentes.* 1. *Non esse universim Fidelibus omnibus præciendam quotidianam communionem, nec geueraliter statuendos dies, quibus Laicis præsertim negotiatoribus Sacra Communio permitti possit, cum neque Tridentinum hos dies præscripserit, & cum nihil certi de cuiusque dignitate, atque integritate, & consequenter de frequentiori, aut quotidiano vitalis panis esu possit constitui* -- 2. *Redarguendos esse ab Episcopis, Parochis, seu Confessariis asserentes communionem quotidianam esse de jure divino:* 3. *Eucharistiam non esse deferendam ad infirmos nisi cum forma decenti:* 4. *Servandum esse usum Ecclesiæ, quoad communionem in Fer. 6. Parasc.* 5. *Nemini tradendas esse plures particulas, aut grandiores solito:* 6. *Non permittendum esse ab Ordinariis, ut Confessio venialium fiat simplici Sacerdoti, quinimò rigoroſè ab iis animadvertendum, in contrasfacientes etiam Regulares, etiam Societatis Jesu. Præterea ex illis verbis -- Frequens ad Sacram alimoniam percipiendam accessus, Confessariorum secreta cordium explorantium iudicio est relinquendus -- antiquatur juxta Cardenas loc. cit. assertio docens. Non oportere, ut Fideles sequantur consilium Confessarii in frequenti Sacra Communionis usurpatione* — Nam revera vix proderit mauna cœleste, si

B

plus

plus ex illo colligatur, quam sit mensura à Moysè præscripta.

§. I I I.

9. **H** Is igitur à Sac. Cong. rectè, ac sapienter statutis legibus, aliqua sunt animadvertenda, ab utraque Dissidentium parte, quæ cum non animadvertantur jam hi, jam illi perperam hoc Decretum in rem suam trahunt. Animadvertendum igitur est: 1. quod Sac. Congr. permittens Confessariorum, ac Pastorum judicio determinare in unoquolibet Communionis frequentiam summoperè ab iisdem Confessariis, ac Pastoribus exigit, ut unusquisque dignè ad Sacram mensam accedat, ac præterea ut omnis irreverentiæ, & scandali suspicio in veri, & immaculati agni susceptione tollatur — constat hoc ex verbis decreti, & præsertim ex illis — *det operam ut unusquisque dignè pro devotionis, & præparationis modo crebrius, aut varius dominici corporis suavitatem degustet* — ex quibus fit quod quamvis Sac. Congr. nolit quemquam sive à frequenti, sive à quotidiana communione repelli, non tamen idcirco, si pro aliquo tempore, & in aliqua regione, ut benè docuit Dicastillo disp. 9. dub. 18. sequerentur turbationes, & scandala, seu obloquutiones populi contra eos, qui communicant quotidie, & inde etiam alii, quibus clarè appareat id non expedire, occasionem sumerent similis frequentię; non inquam idcirco non posset Episcopus, vel ejus Vicarius admonere Confessarios, ut hortentur suos Poenitentes ad minorem frequentiam pro tali tempore, donec sensim, vel in totum, vel ex parte cessent ea
incon-

inconvenientia : hæc siquidem videtur mens Sacrae Congr. dum exigit , ut Pastores curent ne irreverentia , & scandali suspicio resultet ex frequentatione hujus divini Mysterii .

10. Advertendum 2. quod Dignitas , & Reverentia in unoquoque requisita ad frequentandam quotidie communionem , non resultat præcisè ex statu gratiæ cum tenui quadam , & superficiali devotione ; ut probat de Lugo disp. 17. de Euch. , Segneri in Paroch. instructo , & Cardenas loc. cit. qui ex decreto antiquatam jam-putat sententiam Joan. Sanchez in Sel. dis. 22. docentis sufficere carentiam lethalis ad quotidianam communionem . Sed resultat ex alia longè majori dispositione dignoscenda à Confessario in Pœnitente , ut docet citatum Decretum , ex conscientia puritate , frequentia fructu , & ad pietatem processu : nam aliud est id quod requiritur ad recipiendum aliquem effectum hujus Sacramenti , aliud longè diversum *qualiter* oporteat accedere ad Eucharistiam eos ; qui quotidie communicant : Illud primum utique nil aliud petit , quam statum gratiæ , hoc verò 2. petit ex S. Th. qu. 80. art. 10. — *magnam devotionem , & reverentiam* -- imò taliter hoc petit ; ut Sac. Congr. non præcisè ad id quotidie communicantes hortetur , sed velit , ut si quando *se minus paratos senserint* à communionem abstineant , *seq. ad majorem præparationem accingant* .

11. Cum autem difficile admodum sit , teste P. Paulo Segneri in suo Paroch. instructo cap. 21. dignosci à Confessario , an verè aliquis habeat talem requisitam præparationem , & an per frequentem communionem proficiat ; nec ne ? Sequitur quod judi-

cium de dignitate, & Reverentia requisita ad quotidie communicandum respectu hujus, vel illius Poenitentis, sit opus magnæ discretionis, prudentiæ, ac sapientiæ, nec nisi pede, ut ajunt, laneo in hac re procedendum: præsertim respectu Mulierum, ac respectu Conjugatorum.

12. Dixi *respectu Mulierum*, quia ut ait B. Albertus Magnus lib. de mis. in fin. -- de *his qui Mulieres omni die communicant videtur, quod acriter sint reprehendendi, quia nimio usu vilescere faciunt Sacramentum, & potius ex levitate mulierum putatur esse desiderium, quàm ex devotione causatum* -- id ipsum monet Joann. Pontius in cursu Theol. disp. 44. q. 11. concl. 4. -- *propter vanam gloriam*, inquit, *quæ multum prævalere solet apud mulieres* -- immò opportunè in hanc rem, ac festivè, notat Calinus in cap. 7. l. 1. Reg. quòd mulieres sunt natura sua propensæ ad illa Devotionis opera, quæ fiunt extra Domum, fiunt sine labore, & fiunt in aliorum conspectu, ac propterea facile est, ut non sit in eis verum desiderium communicandi, sed quædam naturalis propensio ad hujusmodi opera; & sanè, pace earum dictum sit, quæ vera pietate ducuntur, nonnullæ fortassè minus frequenter communicarent, si id remotis arbitris faciendum esset.

13. Dixi *respectu Conjugatorum*, quia S. Apostolus Paulus non vult eos *invicem fraudari, nisi fortè ex consensu ad tempus*; Sanum autem consilium est ut Conjugati se mutuo consensu abstineant ante sumptionem Eucharistiæ, nisi aliqua ratio urgens oppositum suadeat ex Sanch. l. 9. de mat. disp. 13. Universim tamen notandum ex decreto nec conjugatos, nec negotia-

ziatores &c. eo titulo *quod conjugati*, *quod negotiatores sint*, à quotidiana communione esse repellendos, sed iudicio, prudentiæque Confessariorum secreta cordium explorantium id relinquendum, siquidem ex conjugatis, & ex negotiatoribus ipsis possunt esse, qui dignè se præparent ad quotidianam divinæ Eucharistiæ frequentationem.

14. Advertendum 3. quod post tale Decretum Sacrae Congregationis, quamvis non solum constet quotidianam Communionem esse Laicis existentibus in gratia licitam, sicuti & olim inter sapientes constabat, sed etiam *ex se*, & *ex genere* suo esse iisdem melius, & utilius quotidie communicare quam abstinere, nam propterea opinor Sac. Congreg. vult, ut nemo à sacro convivio seu frequenter, seu quotidie accesserit, repellatur, & hoc omnino providendum à Sacris Pastoribus mandat; tamen quia eadem Sac. Congreg. in pluribus clausulis sui decreti, vult ut unusquisque dignè ad sacram mensam accedat, & Pastorum ac Confessariorum vigilantia committit decernere quid singulis attenta eorum dispositione permittendum sit in ordine ad crebrius, vel rarius communicandum, restat indecisum à tali Decreto — *An communio quotidiana non quidem secundum se, sed prout in hoc, vel illo individuo sit hic, & nunc magis expediens* — ac proinde cum decidendum id sit à Prudentia Confessarii; duo huic observanda sunt, ut sit Fidelis Dispensator, & Prudens: 1. An Facilitas in concedenda communione quotidiana possit esse hallucinationi obnoxia? 2. Quanam regula moralis servanda sit, ne erretur in concedenda aut neganda crebrius aut rarius respectivè quotidiana communione? Alterum ex his ego expediam

diam in resolutione Casus; Alterum in tradendo circa hanc rem practicam doctrinam.

P A R S II.

Proponitur, ac resolvitur Casus:

§. I.

15. **C**Asus est: Confessarius quidam pius facile permittebat, imò suadebat indifferenter personis Laicis existentibus in gratia communionem, quotidianam iis ductus rationibus 1. quia usus frequentis communionis perfectior est, quàm usus rarior: 2. quia Conc. Trident. optaret ut in singulis missis fideles adstantes communicarent: 3. quia talis erat usus primitivæ Ecclesiæ: 4. quia SS. PP. frequenter inculcant quotidianam communionem. 5. quia Sac. Card. Congreg. anno 1587. statuit licitam esse quotidianam communionem, cui novissimè aliud decretum accessit permittens rem hanc integram iudicio Confessarii: Quæritur an Praxis talis pii Confessarii rectè innitatur talibus fundamentis, & an sit obnoxia hallucinationi, ac periculo tum irreverentiæ in tantum Sacramentum, tum damni Spiritualis earum Animarum?

16. R. Præmitto 1. non esse hic quæstionem an, facilitas in concedenda communionem quotidiana sit connexa cum actuali hallucinatione, & damno animarum, nec ne? certum enim videtur non dari talem connexionem, siquidem potest Confessarius ita esse à Deo illuminatus, ita prudens, ac solers, ut licet facilis in hac re, tamen non hallucinetur: sed quæstio est

est an talis Facilitas sit moraliter obnoxia hallucinationi, & exposita periculo damnificandi animas.

17. Præmitto 2. Hallucinationem quoad hanc materiam stare in eo, quòd Confessarius judicet dignas quotidiana communione eas personas quæ re vera non sunt, quòd putet se conformare Decreto Sac. Cong. cum re vera ab ejusdem sanctione discedat, demùm quòd putet se hic, & nunc animarum bono consulere, cum re vera illis potius noceat.

18. Præmitto 3. Damnum Spirituale animarum stare posse in eo, quòd accedentes aliqui Justi quotidie sine sufficienti, & requisita dispositione, vix eximuntur, inquit de Lugo disp. 17. de Eucharistia à multiplici culpa veniali tum antecedenti, tum concomitanti, imo quamplures communionem non rarò habent finem defectuosum, & malum venialiter, nempe inanem gloriam, vanam æmulationem, vel aliquid simile; unde justo Dei judicio fit, quod propter hanc oscitantiam in frequentanda Sacra Eucharistia, & in faciendo hoc tale opus Dei negligenter, disponantur hujusmodi personæ ad culpas graves, & eas tandem in se admittant, ut benè notat Viva in expositione prop. 23. Alex. VIII. Vide.

19. His præmissis: quandoquidem responsio ad primum quæsitum pendet quammaximè ex responsione ad 2. Huic 2. primum satisfaciam. Dico igitur— Facilitas in Confessario concedendi personis Laicis præsertim Mulieribus, existentibus tamen sine conscientia peccati gravis communionem quotidianam, est moraliter obnoxia hallucinationi, ac periculo minuendi reverentiam Sacramento & damnificandi eas animas -- Probo hoc: Omne id quod recedit ab eo, quod regulari-

lariter per hæc tempora docent Theologi tum Scholastici, tum Morales, tum Mystici, & quod observant per hæc tempora sancti, ac religiosissimi Animarum Directores est obnoxium hallucinationi, ac periculo &c. Hæc major videtur certa; nam ut rectè docet Canus de loc. Theol. *in quacumque arte peritis credendum esse ratio monstrat, & sanè hallucinaretur, qui Nautis in navigandi ratione non crederet*: quod in re nostra magis valet ex eo, quia illa, quæ communiter docent sapientiores Theologi, & observant regulariter Sancti fundantur, vel in sacris litteris, vel in Apostolorum traditione, vel in Conciliorum, ac Pontificum sanctionibus, vel in solida aliqua ratione.

20. Atqui Facilitas in Confessario concedendi Personis Laicis communionem quotidianam recedit ab eo, quod sapientissimi Theologi, tum Scholastici, tum Morales, tum Mystici communiter per hæc tempora post Tridentinum docent, & quod sancti, ac prudentes Animarum Directores regulariter observarunt, ergo &c. -- Minor hæc fusè per suas partes probanda est.

21. Et primò quidem recedit ab eo quod docent Theologi, nam hi ferè uno omnes consensu docent -- Raros esse per hæc tempora, quibus rectè, ac sapienter possit concedi quotidiana communio, summo in hac re cum delectu, & cautela procedendum, prudentia, judicioque opus esse non mediocri ad ferendum judicium de uniuscujusque dispositione; ac Stando in linea Directoris, regulariter, non esse Laicis cfebriis, quam octavo quoque die, vel ad summum ter in hebdomada communionem permittendam; unde cum

de cum non sit regulariter actus prudentiæ facilem se in hoc negotio exhibere, siquidem facilitas regulariter deficit à cautela requisita ad prudentiam, & inclinat ad præcipationem quæ est vitium oppositum prudentiæ, sequitur quod qui facilem se in hoc exhibet recedat ab eo, quod docent Theologi, præsertim cum hi raros esse dicant dignos quotidiana communione, ille indifferenter personis iustis hoc permittat; vel etiam suadeat, hi octavo quoque die moneant concedendam, ille quotidianam passim concedat communionem.

22. Do ipsamet verba Theologorum, ac primò quidem proponam Scholasticos, deinde Morales, postremò Mysticos, ut veritas planè elucescat, & sub unum aspectum veniat tota, ac solida eorum doctrina, ex qua etiam quomodo se Confessarius gerere debeat in ordine ad communionem concedendam constabit.

§. I I.

23. **S**cholastici Theologi agmen ducant. Dominicus Soto spectatissimus Ord. Præd. Theol. art. 10. de Euch. sic ait - *Simpliciter loquendo non est utile omnibus hominibus quotidie ad Sacramentum accedere, sed quotiescumque homo ad illud se invenerit præparatum*: ac deinde concludit -- *Sæcularibus conjugatis, qui rei familiari inserviunt non consulerem frequentius, quam à quindena in quindenam ad Sacramentum accedere, licet à peccatis mortalibus sint liberi: nam quamvis curam habeant expurgandæ conscientiæ, nihilominus, ut ait Paulus, non possunt non curare quomodo placeant Uxoribus, & quomodo rei familiari prospiciant, quod frequentiori sumptioni Sacramenti non est aded congruens.*

C

gruens. Idem inferius ait — quocirca si inter Sæculares esset aliqua Persona, & probitate, & modestia insignis, nulla esset irreverentia, imò deceret fortè semel in hebdomada communicare, crebrius autem nullatenus approbare possem.

24. Joann. Poncius egregius Theol. ex Seraphico Ord. in curs. Th. disp. 44. de Euch. concl. 4. postquam quæsit an consulenda sit quotidiana Communio? respondet — *Talem usum fuisse in primitiva Ecclesia, quando primorum Christianorum ardebat charitas, & devotio, & esse etiam jam laudabilissimum singulis, qui pariter essent dispositi; Sed refrigescente jam à pluribus Sæculis illa charitate non est omnino conveniens singulis diebus communicare aliis, quam Sacerdotibus aut iis, qui singulis etiam diebus cum speciali reverentia, & præparatione accedunt, & experientur profectum Spirituale ex tali accessu, quales certè paucissimos reperire est inter Sæculares — & infra addit — Sed ipsis Confessariis, ac Directoribus spiritualibus cavendum valdè est ne suadeant communionem quotidianam, nisi paucissimis, de quorum singulari pietate, ac devotione sincera ex conversatione, & effectibus satis constat communiter iis qui cum ipsis conversantur, nec crederem sufficere, quod ex confessione pateat Confessariis — notetur hoc diligenter à Confessariis, non enim juxta hunc Doctorem facillè debent communionem quotidianam permittere iis, quorum specialis devotio, licèt sit nota ipsi Confessario ex confessione, non est tamen nota aliis, cum quibus tales personæ versantur ex earum conversatione.*

25. Franciscus Suarez è Societate Jesu acerrimus Propugnator frequentiae hujus Div. Sacramenti disp. 69. de

69. de Euch. sect. 4. sic habet — *ut tamen in re morali rationem aliquam insinuemus ad ferendum prudens iudicium, videtur sanè rard esse alicui consulendum, ut ordinaria consuetudine frequentius quàm octavo quoque die communicet: ita significant Doctores, & ita sentiunt prudentes, & experti viri in hac materia, & communis usus Ecclesiæ non parum suvet: nam regulariter loquendo tot sunt humanæ vitæ negotia, & impedimenta, quæ & animum distrahunt, & tempus occupant, ut non possint homines frequentius accedere cum debita dispositione, nec tantum temporis huic actioni dare, quantum par est: hoc tamen semel in hebdomada præstare regulariter non est difficile.*

26. Gabriel Vasquez tom. 3. in 3. part. disp. 214. cap. 3. ait — *In Ecclesia maximè usitatum video, ut frequentius, quam octavo die rard, & non nisi hominibus probatæ virtutis, singulis autem diebus rarissimè, ac paucissimis hoc Sacramentum tribuatur.*

27. Ægidius Coninch qu. 80. de Euch. art. 10. — *Si consideremus, inquit, prudentissimorum per orbem Christianorum hac in re iudicium, & praxim; Laicis qui timoratè vivunt, & à gravioribus abstinent peccatis videtur consulendum, ut semel per hebdomadam communicent, nec sæpius nisi particularis ratio occurrat, præsertim si conjugati sint. Personis autem continentem vitam agentibus, & omnind à mundo abstractis iudicio prudentis Confessarii posset facild concedi, ut etiam diebus festis per hebdomadam occurrentibus communicarent: Cavenda tamen est etiam iis nimia frequentia, ne vel appareant omnind singulares, aut suo exemplo alios pertrahant, ut frequentius communicent quam ipsis expediat.*

28. Idem fermè docent alii Scholaſtici ex diverſis Scholis Cajet., Ovand., Medina, Card. de Lugo, Leſſius, Valentia, Vega, Durand., Ledefma, alii- que quamplures citati à Franc. de Lugo lib. 4. de Euch. cap. 9. q. 6. & ap. Serlogo in cant. antil. 4. ſect. 10. aded, ut multò etiam ante hæc ultima tempora S. Bonavent. in 4. diſt. 12. p. 2. qu. 2. aſſeruerit — *Omnes ergo rationes pro frequentia intelliguntur, ſalva debita præparatione, quæ in pauciſſimis eſt ut ſemper.*

§. I I I.

29. **M** Orales Theologi ſubſcribunt Scholaſticis : nam Salmanticenſis Collegii Patres diſcalceati ex Carmelitis in curſu morali tract. 4. cap. 7. p. 3. ajunt — *quapropter ſpectata hominum conditione pauciſſimi ſunt exceptis Sacerdotibus, quibus conſulendus ſit uſus quotidiana communione: rari, & pauci, qui ad pluſquam hebdomadariam communionem ſint hortandi.*

30. Ochagavia tract. 2. de Euch. q. 16. — *generaliter non eſt fidelibus conſulendum, ut frequentius quam octavo quoque die Sanctiſſimum Eucharistiæ Sacramentum ſuſcipiant, pauciſſimis, ac nonniſi maximos in virtute proſectus conſequutis concedenda eſt Eucharistia quotidiana.*

31. Martinus Bonaccina inſignis è Clero ſæculari Canoniſta, ac Theologus diſp. 4. qu. 7. p. 2. de Euch. apertiffimè affirmat — *Rarè perſonis non religioſis conſulendum eſt, ut frequentius communicent quàm octavo quoque die, ut majori cum reverentia, & judiciî maturitate diſcernant cibum à cibo.*

32. Joann.

32. Joann. Clericatus Præpos. Patavinus decis. 10. de Euch. asserit — *Nullus est, cui mensrua communio consuli non possit: Pauci quibus communio hebdomadaria sit prohibenda: Paucissimi quibus quotidiana sit concedenda* — & infra; censet — *non esse interdicendum quotidianum accessum ad Angelicam mensam laicis, & aliis charactere Sacerdotali non insignitis, si Angelicam vitam ducant* — notetur hæc conditio, & planum fiet, quàm parvus in hac re debeat esse Confessarius.

33. Castropalaus disp. 21. de Euch. pun. 16. postquam dixit laudabilem esse quotidianam communionem, sicuti etiam laudabile est votum virginitatis, seu castitatis &c. subdit — *Verùm hoc intelligendum si magno devotionis, & charitatis fervore ad tantum Sacramentum disponamur: neque enim expedit reverentiæ tanto Sacramento debitæ, ut quotidie communicetur tepido, & remisso in charitate, curisque secularibus implicito: quapropter spectata hominum conditione, paucissimi sunt, quibus expediat singulis diebus communicare, rari, & pauci, quibus plusquam octavo quoque die.*

34. Layman in Sum. cap. 5. de Euch. — *Per accidens consideratis vitæ humanæ impedimentis, & distractionibus, rarè hodie inter Laicos reperiuntur, qui idonei sint ad S. Eucharistiam sæpius quàm octavo quoque die cum ea, qua par est reverentiæ, atque animæ suæ fructu, aliorumque ædificatione sumendam.*

35. Idem fermè docent Silvester Ord. Pr. 3. de Euch. q. 15., Jo. Bapt. Corrad. O. P. p. 1. q. 57. Filiucci Soc. Jes. c. 7. de Euch., Gobattus Soc. Jes. cas. 4. n. 57. Diana Cler. Reg. p. 11. tract. 7. ref. 15. C. Toletus, alique quamplures in ead. ref. citati à
Diana:

Diana : Rogo si rari sunt in toto Orbe Christiano ; qui frequentius quàm octavo quoque die communicari mereantur , qua prudentia censebit Confessarius plures in una Urbe , imo in uno oppidulo reperiri , qui quotidiana sint digni communione ? Possunt reperiri , non inficior , sed cautè procedendum .

§. I V.

36. **A** Gesis porrò Theologos Mysticos consulamus ; hi etiam in eadem prorsus sententia sunt , ac Scholastici , & Morales : Horum aliquos insigniores in medium proferam . Thomas à Kempis , quamvis ante Tridentinum floruerit , tamen quia ejus aureus de imitatione Christi libellus plurimo fuit , & est usui omnibus animarum directoribus , qui post Tridentinum extitere , idcirco primo loco producendus videtur ; ipse itaque in cit. libello l. 4. cap. 4. ait — *Et licet omni die non sim aptus , nec ad celebrandum benè dispositus : dabo tamen operam congruis temporibus divina percipere mysteria , ac tantæ gratiæ participem me præbere* -- Notes quòd devotissimus hic vir instruens alios induendo personam discipuli supponit non facilè in aliquo dari aptitudinem , & dispositionem ad quotidie frequentanda divina mysteria .

37. Joannes de Avila Presbyter , ac Doctor eximiae sanctitatis , ac doctrinæ in Hispania scribens ad quemdam concionatorem , qui hac super re illum per litteras consuluerat , ita loquitur uti extat in parte prima suarum Epistolarum -- *Dico , che l'esser tanti , come ella dice , à communicarsi ogni giorno , mi dà qualche sospetto all'animo , che forse tal cosa non piaccia à Dio ,*

Dio, perebe, richiedendo questo negotio di comunicarsi ogni giorno, grandissima preparatione, tanto che i Teologi specialmente S. Tommaso, e S. Bonaventura parlano di ciò più tosto, come di cosa possibile, che reale, & essendo assai difficile tal preparatione nello stato matrimoniale, io per me non so intendere, come in tanta gente possa essere tanta Santità -- infra verò subdit -- Pare frequenza assai ragionevole per quelli, che non passano la mediocrità dello spirito, il comunicarsi ogni otto giorni una volta, salvo se non occorresse qual cosa frà settimana, e chi ne vorrà far più parli con V. R., e quando vedrà in alcuno il profitto, gli lo conceda, ma siano pochi, communemente cogli altri stia pur sopra di se raccomandandosi prima a Dio, e domandandogli lume per non errare - Notetur quanta cautela in hac re procedendum sit.

38. Ludovicus Granatensis Ord. Præd. spectatæ sanctitatis, ac doctrinæ vir, quem summis laudibus extulit Greg. XIII. propter ejus excellentiam in doctrina spirituali, & quem S. Carolus Borromæus absentem consulebat, & vehementer amabat, ait, uti extat apud Corradum, quòd ad hoc Sacramentum accedere regulariter cuicumque personæ sufficere debet dominicis tantum diebus -- Intelligas nisi aliqua sit specialis causa, vel devotio: sed videas quàm esset alienus à concedenda passim quotidiana.

39. Ludovicus de Ponte Soc. Jesu insignis vitæ Spiritualis Magister 1. tom. perf. Christianæ, tract. 4. cap. 6. inquit - satis apparet si ordinariam hominum dispositionem attendamus duo posse esse extrema circa frequentiam communionis vitiosa: alterum eorum, qui rarius quàm par esset, accedunt, alterum eorum, qui

qui nimis frequenter : in qua re difficile est medium attingere — infra deinde dat pro hac re varias regulas , quarum una est -- *Posse aliquas personas excellentis adeo virtutis , ac sanctitatis esse , adeoque divinum hoc Sacramentum appetere , & esurire , ut meritis debeat eis sacra communio ter , aut quater singulis hebdomadis concedi : imo aliquibus , etsi raris , etiam quotidie si personæ sint divino obsequio omnino mancipatæ* — Expendantur à confessoribus hæc verba & intelligetur quam minimè deceat facilitas in indulgenda quotidiana communione .

40. Eusebius Nieremberg. Soc. Jesu cujus piissimi libri quantus ipse vir sit , satis ostendunt in suis pandectis vitæ asceticæ l. 2. doct. 4. cap. 22. postquam laudavit usum communicandi octavo quoque die subdit . *Et licet olim major frequentia fuerit in usu Fidelium non solum Apostolorum temporibus , sed etiam postea per plures annos : nihilominus his frigidis temporibus hæc frequentia satis magna judicatur* — Unde si hæc frequentia est satis magna , cautè Confessarii incedant , & majorem facile non concedant , nisi majores , & graviores hic , & nunc causæ occurrant .

41. Demum in Vita S. Margaritæ de Cortona descripta à Francisco Marchesio lib. 1. cap. 20. habetur , quod ipse Episcopus Animarum nostrarum Christus Dominus dixerit , ac mandaverit suæ Fidei Servæ hæc -- *Farai avvertito in mio nome il tuo P. Confessore , à non ammettere in avvenire con tanta facilità qualunque persona , che addimanda il Sacramento , ma che lo comparta solo alle Anime ben disposte e pure , le quali con grande ardore di spirito lo desiderano , perche io sono pur troppo offeso dalle frequenti comunioni degl' Uomi-*

Uomini, i quali senza ritrarne alcun frutto malamente vivono -- Utinam hæc monitio Confessariorum, omnium menti inhæreat!

42. Stat igitur quòd Sapientissimi omnium Ordinum Theologi tum Scholastici, tum Morales, tum mystici docent Raros, imò rarissimos esse, quibus prudenter, & congruè possit à Confessariis quotidiana communio indulgeri: At rogo, qua veritate id assererent, si rectè procederent ii animarum Directores, qui facile plures, & pluribus in locis ad quotidianam communionem admittunt? Profectò si benè procedunt hi Confessarii, non video quomodo vera sit horum Theologorum Doctrina, siquidem non rari, sed plures, & plures sunt non solum in Christiana Republica, sed in uno oppido quibus consulenda sit quotidiana communio.

§. V.

43. **S**upereff ut videamus, an talis Facilitas etiam recedat à praxi, quam tenuerunt Sancti, ac prudentes Animarum moderatores, qui floruerunt per hæc duo ultima sæcula: & quidem proum est ostendere, quod sic, ut constat ab exemplis: nam.

44. S. Cajetanus Thienæus, qui ut testantur lectiones Breviarii Sanctissimæ Eucharistiæ frequentiorum usum maximè promovit, ita se gessit juxta ejus vitam descriptam à Jo. Bapt. Castaldi -- *Prima dispose il popoli à frequentare la Comunione una volta il mese, poi che si frequentasse ogni Domenica, v'aggiunse le feste fra settimana, & anco i Venerdì* -- Ubi notes, quòd qui maximè fuit Promotor frequentis usus, & ut

D

talis

talís ab Ecclesia laudatur, non legitur quod ordinaria consuetudine quotidianam communionem inuenerit.

45. S. Ignatius de Loyola, à quo Sacramentorum frequentia incrementum accepit, tam parcus erat, & cautus in concedenda laicis quotidiana communione, ut teste Sacchino lib. 3. hist. Soc. n. 8. -- *etiam eos, quibus quotidiana diuinæ mensæ consuetudo jam erat, quanquam non cogendos, tamen adhortandos aiebat, ut id rarius facerent* — quare obiter notetur, non esse cur quis miretur si aliqui è Soc. aliquando Laicis consilium dent, ut rarius, quàm singulis diebus communicent; nam hoc documentum habent à S. Fundatore optimo Animarum Moderatore, ac zelantissimo SS. Eucharistiæ quoad usum Propagatore.

46. S. Philippus Nerius, ut constât ex ejus vita descripta à P. Bacci l. 2. c. 1. *Voleva che non solo i Sacerdoti, ma ancora i Laici frequentassero questo Sacramento, per la qual cosa alcuni de' suoi Penitenti si comunicavano ogn'otto giorni, molti ogni festa, altri tre volte la settimana, ed alcuni, se ben pochi, ogni giorno* — ubi notetur, quod S. Philippus erat ita à Deo illuminatus, ut probè intelligeret quid cuique expediret: notetur quod ejus Poenitentes erant plurimi ita, ut tota ferè Roma ad ipsum conflueret: notetur quod non pauci ejusdem Poenitentes fuerunt insigni pietate, ac sanctitate excellentes: unde magna in eo relucet circumspectio, & cautela, quod *paucos* communionē quotidiana dignaretur: immo Sanctus Vir sæpissimè dictitabat -- *Non tutto quello che è in se stesso buono, è buono in particolare* — Bonum est v. g. quotidie communicare *secundum se*, sed non semper est bonum, seu
expe-

expediens prout in individuo : & ad Mulieres quod attinet sapè ille laudabat , atque in exemplum proponebat Martham quamdam Spoletinam : Cur ? numquid quia semper adstabat , sicut novella olivarum in circuitu mensæ Domini ? Minimè gentium : sed quia , ut ipse aiebat — *attendeva a filare in casa sua* .

47. S. Franciscus Salesius agens de frequenti communione cap. 20. introd. ad vit. devot. — *Io , dice , nè vitupero , nè lodo assolutamente , che uno si comunichi ogni giorno , ma lascio questo alla discrezione del P. Spirituale , perche la disposizione , che si ricerca ad una sì frequente communione dovendo essere tanto esquisita , non è bene darne consiglio in generale* — notentur illa verba — *la disposizione che si ricerca , dovendo essere tanto esquisita* — quæ sanè indicant , quàm parcè , & cautè in hac re Sanctus Vir procederet .

48. S. Carolus Borromæus , ut videre est in pluribus ab eo habitis Conciliis provincialibus commendat quidem sæpissimè frequentem communionem , non autem unquam , neque ab ipsis Clericis exigit , aut petit quotidianam ; imò ab ipsis Clericis cum non petat frequentiore , quam hebdomadariam , & in festis occurrentibus , colligitur quod S. Antistes non ita facilis esset ad Laicis quotidianam indulgendam .

49. Jacobus Laynez , qui Concilio Tridentino interfuit Pontificii Theologi munus exequens : teste Sacch. lib. 3. hist. Soc. n. 6. collectis in unum pluribus aliis Theologis hanc rem de concedenda crebrius aut rarius Laicis communione diligenter ad examen vocavit , ac discussit , ut ad certam quamdam ac prudentem normam Soc. Confessarii se componerent , nec in tanta re errarent , ac demùm statuit — *permetti nequa-*

quam debere, ut singulis diebus mysteria diviniſſima Laici ſumerent, niſi ſi quis fortè ita viveret ut vita ejus perpetua ad Sacroſanctam communionem præparatio videretur.

50. Religioſiſſimi illi Animarum Directores ex Dominicana Familia, qui hoc ultimo præcedenti ſæculo direxerunt in Spiritu S. Roſam Peruanam nunquam illi ſtabiliter, & ordinaria conſuetudine permiſerunt communionem quotidianam: unde historicus vitæ hujus P. Laurentius Luccheſini ait — *ter ut minimum in hebdomada divina Euchariftia reficiebatur, quinquies non rarè, & aliquando in ſingulos dies* — Notetur ly *aliquando*, & notetur quod erat S. Roſa, quæ accedens ad ſacram menſam facie ipſa præferebat cordis incendium, adeo ut cœleſti ſplendore ſæpiſſimè perſuſa Sacerdotibus ipſis terrorem incuteret.

51. Religioſiſſimi illi viri, qui direxerunt in Spiritu hiſ noſtris temporibus Auguſtiſſimam Eleonoram Neoburgicam matrem regnantis Imperatoris Fœminam planè omnibus ornatam virtutibus, ut conſtat ex ejus vita nuper impreſſa, nunquam illi conceſſerunt, neque in ipſo ſtatu viduili quotidianam communionem, ſed ter in hebdomada: adèd in hac re cauti, & Temperati erant.

52. Denum vix in ullo, quòd ſciam, Religioſum Novitiatu, licèt quotquot in iis vivunt religioſiſſimam ad exactæ regularis obſervantiæ normam vitam traducant, conceditur plus quam ter in hebdomada Sacra Euchariftia: quòd ſanè non leve argumentum eſt ad probandum quanta diſcretione, & moderatione procedere debeant Confeſſarii in hoc negotio reſpectu Laicorum ſæcularium.

53. Ne-

53. Neque illos ad facilitatem incitare debet, quòd S. Catharina Senensis quotidie communicaret, quòd idem faceret per hæc nostra tempora S. Maria Magdalena de Pazzis cum toto integro suo monasterio: nam in primis quod duæ adeò S. Foeminæ id usurpaverint non probat non esse raras eas quibus id concedendum sit: Adde quod de S. Catharina Senensi ita loquitur S. Antoninus tit. 23. cap. 14. §. 8. — *Erat satis inter Laicos vulgatum quòd Catharina ista quotidie communicabat, & ex Sacramento absque alio cibo vitam transigebat, sed quod pie dicebant, & suspicabantur, utique verum non erat, non enim quotidie sed frequenter Sacramentum sumebat* — Monasterium verò S. M. Magdalenæ de Pazzis, & Sancta ipsa hoc habent peculiare, ex quo latum cum cæteris discrimen oritur, nam cum ex instituto Religioso id faciant & ipsa fecerit, habent, & ipsa habuit *gratiam vocationis*, seu auxilia quædam actualia specialia ad id ritè exequendum: unde ex eo quod ita fecerit Sancta, & quod ita faciant illæ religiosissimæ matres, non est cur facilis esse debeat confessarius in indulgenda aliis quotidiana communione.

54. Postremo sic concludo: integrum est iudicium quod plurimorum prudentium sententia comprobatur *cap. extra dist. 64.* ergo à contrario hallucinationi est obnoxium illud iudicium quod à plurimorum sententia recedit -- atqui iudicium eorum Confessariorum qui facillè hanc communionem quotidianam concedunt iustis simpliciter recedit à plurimorum sententia, siquidem plurimi ajunt raros, paucissimos esse in toto orbe, quibus concedenda sit, ergo iudicium talium Confessariorum hallucinationi obnoxium est &c.

At in-

At inquit, nos innititur gravibus fundamentis in hoc faciendo : Bene est : expendamus illa : & sit nostra Secunda Assertio .

§. V I.

55. **D**Ico 2. Praxis talium Confessariorum non bene innititur fundamentis in casu expositis : Probo hoc explicando sensum quem habent fundamenta adducta , ex quo sensu liquidò constabit talia fundamenta nihil patrocinari praxi talium Confessariorum . Ac primùm erat : - *Usus frequentis Communionis perfectior est , quàm usus rarior* : Admitto hoc libentissimè : imò tam certum hoc esse affirmo , ut nullus de hoc Catholicus possit dubitare , sicuti bene observat de Lugo loc. cit. sed quid inde ? Etiam status Religionis perfectior est , quàm status conjugalis , etiam votum castitatis perpetuæ perfectius est quàm votum castitatis ad tempus : numquid proinde facilis quis esse debet in faciendo potestatem Poenitentibus emittendi votum castitatis perpetuæ ? Numquid facilè quis suadebit huic vel alteri in particulari statum Religionis præ alio statu ? Recolatur illud dictum S. Philippi Neri -- *non tutto quello che è buono in se stesso è buono in particolare* -- Sensus itaque talis propositionis , nempe quod usus frequentior sit in se perfectior non negatur , imò asseritur , imò proponitur ad populum : Sed an huic , vel illi expediat hic , & nunc usus frequentior , quàm rarior hoc opus , hic labor est , & idcirco consideratè , & cum cautela procedere debet Confessarius . Videatur *artic. 10. q. 80. S. Thom. in 3. p.* ubi rectè explicatur , qua ratione frequens usus
Sacra-

Sacramenti semper expediat, & qua ratione possit per accidens non expedire.

Replicabit fortasse aliquis: *Usus Sacrae Eucharistiae, seu Sacra Communio auget gratiam sanctificantem ex opere operato homini in gratia existenti, ergo quilibet in gratia existens utiliter, ac sanctè facit accedendo ad hunc divinum cibum, adeoque facilitas Confessarii in concedendo Laicis quotidianam communionem non est obnoxia hallucinationi.*

Sed contra: Nam in primis non desunt auctores satis graves, qui negant sufficere solam existentiam in gratia ad hoc, ut Sacra Communio pariat in subiecto augmentum gratiae sanctificantis *ex opere operato*, sed ulteriùs requirant actualem devotionem, & fervorem; ut videre est apud Castrop. tract. 21. disp. unica p. 11. deindè, esto, sit verum sufficere carentiam lethalis in subiecto, ad hoc ut habeatur per sacram communionem augmentum gratiae sanctificantis ut docet Suarez in 3. p. disp. 63. sect. 3. Numquid proindè sequitur, ut respectu cujuslibet hominis justii utilior sit quotidiana communio, quam communio non ita frequens? Nequaquam: etenim 1. gratia quae ex opere operato datur in Sacramentis proportionem habet cum dispositionibus recipientis, uti Suarez ibi sect. 4. cum autem possit quis esse magis dispositus in communione non adeò frequenti, potest etiam contingere, ut majus augmentum gratiae recipiat hic in communione minus frequenti, quam in quotidiana, & consequenter utilior illi sit communio non adeò frequens, quam quotidiana, & frequentissima: 2. Communio quotidiana, ut respectu hujus vel illius subiecti dicatur utilior; pensanda est, ut rectè notat Moya, non

non solum utilitas proveniens recipienti *ex opere operato*, sed hæc, & reverentia debita Sacramento: cum autem longè major possit reverentia reperiri in hoc, vel illo subjecto si frequenter quidem, sed non quotidie accedat; quàm si accedat quotidie; hinc est quòd respectu hujus, vel illius subjecti non semper sit utilior communio quotidiana, etiamsi per talem quotidianam communionem habeatur augmentum gratiæ -- & consequenter Confessarius non debet esse facilis &c.

56. Concilium Tridentinum optat ut in singulis Missis fideles adstantes communicent -- R. in primis, ut benè notat, Cardenas, Tridentinum non id optat *absolute*, sed *optaret*, idest inclinatur quodammodo ad optandum: *non optat absolute*, quia non omnes, imò paucissimi habent eam dispositionem, quæ requiritur ad talem frequentiam: *inclinatur ad id optandum*, quia id, ut dictum est, perfectius in se est: R. 2. quod S. Synodus optat quidem, ut omnes fideles adstantes communicent: sed simul optat in Fidelibus veram, & congruam dispositionem: unde objectum desiderii habiti à Tridentino non est sola communio quotidiana, sed complexum ex eadem, & ex congrua in Fidelibus dispositione: cum autem hæc in paucissimis reperiatur; Sicuti Sancta Synodus idcirco nihil præcepit sed tantum quid cuperet indicavit; ita Confessarius non facilis debet esse in concedendo tali frequenti usu, sed temperamentum juxta uniuscujusque dispositionem adhibere.

57. Talis erat Usus primitivæ Ecclesiæ ut quotidie communicarent: R. Verissimum id esse, ut constat ex actis Apostolicis, & ex Angelico in resp. ad 5. sed fer-

fervorem illorum temporum proportionem habuisse cum ea frequentia, uti optimè notat S. Bonav. in 4. dist. 12. p. 2. q. 2. apud de Lugo d. 17. quare si aliquis inveniatur habere fervorem illorum primorum Christianorum, poterit illi laudabiliter, & faciliter concedi quotidiana communio: At quinam erat fervor illorum primorum Christianorum? Audiatur ex Cornel. à Lapide in cap. 5. act. Apostolorum: ubi ex Josepho refert eos fuisse opum contemptores, paupertatis, & vitæ communis amantes, religiosos erga Deum, silentio deditos, psalmodos, mites, fideles, pacificos, continentes, justos, abstinentes, longævus, in tormentis constantes, imò ridentes, immortalitati, & æternitati viventes quasi Hæroes, & Semideos -- Rursus ibidem ex Philone refert -- quod illi piè, sanctè, justèque vivebant triplici regula utentes, amore Dei ardentissimo, virtutis cultu diligentissimo; charitate proximi ferventissima -- Rogo quotnam sunt hujusmodi nostris temporibus? Utinam multi! sed. juxta Theologos, ac PP. pauci sunt, ac propterea Confessarius non debet usum illorum temporum ad tuendum suam facilitatem obtendere, sed potius cum S. Bonaventura concludere -- *Si aliquis videat se esse in statu Ecclesiæ primitivæ, laudandum est quotidie communicare, si autem in statu Ecclesiæ finali, utpotè frigidum, & tardum laudandum est quoddam rari, si autem medio modo, medio modo se debet habere, & aliquando debet cessare ut addiscat revereri, aliquando accedere, ut inflammetur amore.*

58. SS. PP. frequenter inculcant quotidianam communionem, & usum frequentissimum illius -- R. cum S. Bonavent. omnes tales textus SS. PP. intelli-

E

gen-

gendos esse salva semper debita preparatione quæ in paucissimis est — unde optimè notat Cardenas, quod omnia Concilia, & PP. qui adducuntur, & possunt adduci ad tuendam facilitatem, non faciunt ad rem, quia illi dum hortantur ad communionem quotidianam simul hortantur ad debitam, & congruam dispositionem quæ rarò reperitur: Adde quod Sancti PP. multoties loquuntur non *presbè*, & *Scholasticè*, sed concionatorio modo in homiliis habitis ad Populum: expedit autem ut concionatores frequenter inculcent frequentiam communionis, ejusque utilitatem amplificent quia populus magis per se inclinatur ad raritatem, quàm ad frequentiam, & si frequentia reprehendatur (quod sanè, & S. Carolus in suis Conciliis vetuit, & Franciscus de Lugo non carere gravi peccato judicat) si inquam frequentia reprehendatur, faciliè erit, ut plures suam desidiam reverentiæ velamine tegant: unde bene notat Card. de Lugo. — *debet Theologum scire quid doceat Theologica veritas in hoc negotio, sermonem tamen temperare, & apud plebem in favorem frequentie loqui prout Sancti PP. fecerunt* — monet tamen Decretum Sac. Congr. ut Concionatores postquam frequentiam commendaverint, statim de magna ad illud sumendum Sacramentum preparatione orationem habeant. Demum, accedit quod SS. PP. multa dixerunt quæ videntur præferre aliquam exaggerationem, quia toti erant in reprehendendo, & confutando adversarios illos, qui infrequentiam volebant, ut contigit in Oriente tempore S. Chrysostomi: quandò autem quis è pulpito, & apud populum vitium aliquod contra ejusdem defensores reprehendit, faciliè, & etiam prudenter oppositam virtutem exaggerat:

Hinc

Hinc etiam factum fuit, quod nostra Societas cum sub ejus initium in invidiam apud aliquos vocaretur, imò hæresis accusaretur ex eo quod frequentiam hujus Divini cibi promoveret; S. Thomas de Villanova è pulpito tum talem frequentiam, tum Societatem defende- rit, & Christophorus Madritius librum de frequentis communionis laude conscripserit: quæ laus semper intelligenda est, vel de frequentia secundum se, vel de frequentia suppositis terminis habilibus in subiecto.

59. Neque Facilitati Confessariorum patrocinator quod SS. PP. aliquando dicant semper accedendum esse ad communionem quandò quis non habet lathale: nam *ly semper* debet accipi cum proportionem, inquit Lugo, idest suis temporibus congruis -- sicut *ly semper* orandum debet accipi cum eadem proportionem: Item nec patrocinator, quod aliqui Sancti dicant Raritatem non reddere hominem dispositum, & quod qui non est dignus accipere quotidie non est dignus accipere post annum: nam verum est quod raritas accessus ad Sacram Mensam per se non parit dispositionem, eam tamen parit *occasionaliter*, & qui non est dignus accipere quotidie, non est dignus accipere post annum condignitate adæquationis, tamen est dignus accipere post annum *sine indecentia*, quæ utique esset si in statu tepido quis accederet quotidie, non est autem si accedat post annum, quia post annum, datur major necessitas, qua excusatur illa irreverentia.

60. Sacra Card. Congreg. anno 1587. statuit non esse illicitum quotidie communicare -- R. utique non est illicitum: nullum enim extat præceptum prohibens quotidianam communionem: sed quid inde? Peregrinatio Compostellana non est illicita, imò sancta,

nunquid tu facilè omnibus famellis consuleres Compostellanam peregrinationem ? Quamvis igitur res aliqua non sit illicita , tamen multa consideranda sunt , ut eadem hic , & nunc in particulari alicui suadeatur : certè S. Thomas considerans communionem ex parte sumentis pronunciat -- *non est utile omnibus hominibus quotidie ad hoc Sacramentum accedere* . -- Adde quod quamvis quotidiana communio non sit illicita ex decreto Congreg. cit. id tamen intelligendum de quotidiana communione *secundum se* ; nam per accidens , & ex circumstantiis potest esse alicui illicita *saltem leviter* , in hoc sensu , juxta de Lugo , non quatenus actus communicandi sit illicitus , sed quatenus actus habendi verbi gratia voluntariam distractionem , aut inanem gloriam , aut quid simile habet in circumstantia accedendi ad Eucharistiam non solùm malitiam propriam objecti , sed etiam malitiam contra religionem propter irreverentiam contra Sacramentum -- & notetur quòd talis irreverentia , & consequenter venialis aliqua culpa facilius potest incurri à personis devotis , quàm ab aliis , quia à personis devotis major reverentia , & præparatio juxta de Lugo requiritur ex præcepto levi , quàm ab aliis personis justis , unde facilius est quod peccent leviter in accedendo ad communionem istæ personæ devotæ , quàm aliæ , ac propterea non ita facilis debet esse confessarius in concedendo etiam istis quotidianam communionem . Certè S. Romualdus nolebat ut illi Monachi communicarent , qui inter orandum dormitassent , videlicet , quia in talibus viris spiritualem vitam profitentibus talis dormitatio videbatur S. Abbati indispositio quædam ad Communionem , quæ fortasse in aliis non esset .

61. Sacra Congr. in ultimo decreto de quotidiana communione relinquit hanc rem integram iudicio Confessarii — R. relinquit iudicio Confessarii, at iudicio recto, non erroneo: Etiam in Jubilæis committitur arbitrio Confessarii commutatio votorum, non tamen idcirco temerè Confessarius in hac re procedere debet, sed ea expendere, quæ expendenda monent quoad commutationem Sanchez, aliique Theologi: similiter dicendum in præsentī materia: debet proinde Confessarius, ne erret expendere quæ docent Theologi, quæ usurparunt Sancti, cum autem doceant Theologi rarissimos esse quibus quotidiana communio concedenda sit ex eo quod in rarissimis reperiatur debita, & congrua dispositio non debet præcipitanter omnibus indifferenter iustis quotidianam communionem concedere, sed benè expendere an in Pœnitentibus sint dispositiones requisitæ ad communionem quotidianam.

62. Duo fortasse replicabit hic Confessarius facilis ad communionem indulgentiam: 1. Sacra Congr. non vult assignari certos dies quibus liceat, aut non liceat ad sacram mensam accedere, ergo Theologi supra citati assignantes octiduum regulariter pro frequentanda communione non benè docent, adeoque illis non standum; 2. Sacerdotes quotidie celebrant, & quotidiana celebratio in illis laudatur, nec tanta cautela præscribitur, cur igitur tanta adhibenda est in Laicis, cum ex his multi devotiores sint quàm Sacerdotes? — R. ad 1. Aliud est assignare certos dies, quibus generaliter unica præcepti formula possint, vel non possint Laici accedere ad sacram mensam: aliud assignare certam regulam, quæ possit plerumque ferè in omnibus

bus observari, quando specialis causa aliter faciendi non occurrat: Illud primum prohibetur à Sacra Congr. & quidem rectè quia possunt reperiri Laici adeo Sancti, quibus expediat frequentior communio: Hoc verò 2. non prohibetur, & hoc faciunt citati supra Theologi indicando octavum quemque diem pro frequentanda communione: sicuti hoc etiam facit regula 26. Sacerdotum Societatis Jesu quæ proinde optimè videtur coherere cum hoc decreto, & cum doctrina Theologorum, non enim præscribit generaliter dies, quibus huic vel illi generi personarum danda, aut non danda sit communio, sed assignat quamdam mensuram, quæ facilius, & congruentius potest ferè in omnibus observari, ne detur locus errori, ac proinde Lainius cum cæteris Patribus, ut refert Sacchinus lib. 3. hist. Soc. n. 6. dixerunt — *Moderationem justam videri, si Laici octavo quoque die communionem usurpent* -- Notes ly *Moderationem*: non etenim dixerunt *Taxationem*, aut *Præscriptionem*.

R. ad 2. 1. quod Sacerdotes cum pari dispositione, quam habent Laici, possunt frequentius celebrando communicare, quam Laici, quia defectus dispositionis, quem fortè habent compensatur per obligationem quam habent ex officio: 2. Sacerdotes frequentius possunt communicare celebrando, quia ex se *ratione* Status sunt regulariter magis dispositi, quam Laici, utpotè ratione status separati à curis secularibus: præterea ratione Ordinis habent auxilia, quædam gratiæ ad ritè, sanctèque peragendam illam actionem sacrosanctam, quæ auxilia non habent Laici. 3. non inficior, quod etiam Sacerdoti qui culpabiliter, vel inculpabiliter ob frequentem, & quotidiana-

dianam communionem est in periculo irreverentiæ, & indevotionis, consilium dandum *esset* de abstinendo aliquando, ut postea reverentius accederet, sicuti docet S. Bonaventura apud de Lugo disp. 17. — Quamquam rarò crederem inculpabiliter eventurum tale periculum Sacerdoti, ac propterea cum tale periculum irreverentiæ regulariter eveniat ex culpa Sacerdotis, auctor illi essem, ut potius ipse tolleret talem culpam, quam omitteret sacrum, ea ductus ratione, quia innumera bona, & immensi fructus proveniunt Fidelibus tum vivis, tum defunctis ex Sacrosancto Missæ Sacrificio.

Constat proindè ex hætenus dictis id, quod asseruimus 2. loco, nempe quod Praxis talis pii Sacerdotis facilis in concedenda quotidiana communione, non benè innititur fundamentis in casu expostitis.

P A R S III.

Proponuntur aliquot morales regula servanda à Confessario in concedendo crebrius, aut rariùs Laicis Sacram Communionem, ut sit fidelis Dispensator, & prudens.

§. I.

63. **T** Riplicem assigno regulam desumptam ex doctrina Sanctorum, ex Theologis, & ex ipso Decreto. Prima igitur Regula est ex S. Francisco Salesio: Hic Sanctus cap. 20. lib. 2. Introd. ad vit. devot.

devot. sic docet — *Per communicarsi ogn'otto giorni bisogna non avere nè peccato mortale, nè affetto al peccato veniale, ed avere un gran desiderio di communicarsi, ma per continuare tutti i giorni bisogna di più aver superata la maggior parte delle sue male inclinationi, e che questo sia col consiglio del P. Spirituale* — Quamobrem ecce satis congruam regulam pro concedenda communione quotidiana, vel non concedenda — Videat scilicet Confessarius an Persona petens communionem quotidianam 1. sit expers peccati mortalis, 2. an sit expers omnis affectus ad peccata venialia, 3. an habeat ardens desiderium communicandi, 4. an superaverit plerasque suas pravas inclinationes tum partis concupiscibilis, tum partis irascibilis, & siquidem ita invenerit, tunc poterit quidem eam adhortari ut rariùs, vel certis diebus communicet, non poterit tamen nisi alia occurrat causa, v. g. ad eam mortificandam denegare illi communionem quotidianam, aut ab eadem eam repellere, vel deterrere juxta supra relatum Decretum: Dixi poterit adhortari: addo nunc meo quidem judicio exequens munus directoris adhortarer, tum quia rarò mihi crederem adesse dispositiones has ex Salesio requisitas, tum quia ut bene notat Calinus loc. supracit. n. 12. ita homines à natura comparati sunt ut eorum fervor sensim tepescat in rebus quotidianis: nam ex assuetis non fit passio, unde si quotidie Divinus cibus accipiatur, facilè est ut tepide, & sine congrua dispositione accipiatur. Vid. idem auctor loc. cit. n. 12.

64. **S**ecunda Regula est ex Paulo Segneri in suo Parocho instructo cap. 21. -- Nempe observet diligenter Confessarius finem quem habent, & quomoveantur personæ ad frequentem communionem usurpandam, & si animadvertat talem frequentiam non provenire ex fame talis divini cibi, sed ex quadam interna æmulatione, ex quadam ambitione, ex quadam consuetudine, non consultum videtur iis frequentior communionem, & præsertim quotidianam concedere: quòd olim etiam solidè doctèque monuerat Ludovicus de Ponte p. 1. perf. Christianæ tract. 4. cap. 6. omninò videndus.

65. At undè cognoscet Confessarius finem sincerum, & non vitiosum talium Personarum? R. Cognoscet si quando eis denegatur communio illæ, vel gravatè, & ægro animo obedian, vel absolutè non obedian. cundo ad alium Confessarium, aut superbè asserendo non posse se recedere à consuetudine quam habent: cognoscet etiam, ut benè notat Sradiera, tract. 14. c. 19. degl'inganni &c. -- *Investigando che effetti provino in se dopò la comunione, e se scoprirai, dice, che non v'è altro d poco altro fuor di quel gusto, d soddisfazione d'avere avuta la comunione, questo non è il desiderio sodo, e massiccio che richiede l'Eucharistia; ma s'addimandano vogliuocie, & appetiti non mali, ma imperfettissimi, e di pochissima sostanza* -- Idèoque Confessarius non debet, ut prudens dispensator sit, iis concedere quotidianam communionem *reguliter*: Certè illæ Animæ, quæ sincerum valdè habuerunt desiderium Divinæ Eucharistiæ alios experiebantur

F

tur

tur post communionem effectus : Audiantur , quos experiretur S. Catherina Senensis -- *Tantus ejus in Eucharistiam erat ardor , tanta fames , ut si quotidie non communicasset videretur animam exalaturam , mox verò ut communicaret , & corpore , & Spiritu (en effectus) evadebat ita valida , ut ingentes subiret labores , ac pœnitentias , & cibos omnes humanos fastidiret -- apud Cor. à Lap. Apoc. cap. 2. alii hujus divini cibi post ejusdem sumptionem effectus videantur apud Rodriguez tom. 2. tract. de Euch.*

66. Demum notetur cum Ludovico à Ponte loc. cit. quod vera Fames , & sincerum desiderium frequentia extraordinaria hujus Divini cibi non statim incipit postquam aliqua Persona devotioni , ac superficiali cuidam pietati se addixit ; sed regulariter postquam magnos , ac multos habuit in solida virtute progressus : En ejusdem Auctoris piissimi verba -- *Specialis , suaviorque vocatio , qua Christus Dominus electos suos ad majorem hujus Sacramenti frequentiam invitare solet , ut plurimum incipit , postquam illi dies permultos in sanctis operationibus se exercuerunt , vultque ipse singulare suum erga eos studium , & favorem ostendere , bonaque illa opera remunerare ; & Spiritum addere , ut prosequantur , & in perfectione virtutum omnium proficiant -- Undè mirum sanè est , quod aliqua Personæ spirituales vitam , & incipiant , & absolvant in quotidiana hujus Divini cibi usurpatione .*

§. III.

67. **T**ertia regula ex decreto ipso , & ex communi Theologorum est -- Nempè -- *Explorare frequentia fructum , & ad pietatem processum --*
 Quan-

Quando itaque aliquis ex frequentis communione verè proficit, & proprium hujus Sacramenti fructum recipit, quando in solidis virtutibus per frequentem communionem processus habet; tunc sanè illi Confessarius poterit uberiorem mensuram hujus Eucharistici panis libenter dare, at vero si secus contingat expediet potius, uti in tuenda corporis valetudine, cibum minuire, & exercitium augere, idest, minuire communionem, & augere alia pietatis opera. Vid. Cajet. 3. p. q. 80. art. 10.

68. Verùm hoc opus, hic labor est: Undè intelliget Confessarius, an aliquis ex frequentia Eucharistiae fructum capiat, & an in solidis virtutibus proficiat? R. cum S. Francisco Salesio in 18. Tratt. ubi sic ait — *Desiderate forse sapere, come conoscerete, se v'approfitate con ricevere i Sacramenti? Lo conoscere se v'avanzate nelle virtù, che sono proprie di tali Sacramenti, v. g. voi conoscerete cavar frutto dalla comunione, se voi frequentandola diventerete dolce, soave, e umile, poiche tale è la virtù propria di questo Sacramento, che è tutto dolce, tutto soave, e tutto mele, mà se al contrario voi non diventate più umile, nè più dolce, meritate che vi si levi il pane, giacche non volete faticare.*

69. R. 2. cum Sancto Apostolo Paulo 2. ad Cor. cap. 10. — *Ipsi in nobis nosmetipsos metientes, & comparantes nosmetipsos nobis* — Idest Confessarius prudens metiatur Pœnitentes in ipsismetipsis, & comparet illos in ipsismetipsis, observet quales fuerint ante frequentem communionem, & quales sint nunc, an sint faciles in committendis venialibus sicut prius? an sint iracundi sicut prius? an sint propriarum Amatores

commoditatum sicut prius? Et si ita eos reperiatur probabilem conjecturam habebit, quod non proficiant, sin verò secus, constabit profectus in virtutibus. Notet tamen diligenter Confessarius in hac instituenda, comparatione illud, quod rectè notat Joan. Pet. Pnamonti in suo Direct. cap. 29. — *Non credere che tutto ciò, che prova internamente una Persona per la sua complessione affettuosa sia un eccesso di perfezione, & di accrescimento nella Pietà* -- atque idecirco ibidem docet idem Auctor -- *Non far conto in materia di amor di Dio, se non del forte: non si devono disprezzare le tenerezze, & altre impressioni sensibili, ma non se ne deve far conto in maniera, che il Direttore se ne serva per misura* -- Quòd idem olim monuerat, & usurpaverat in animarum directione S. Ignatius uti refert Maffejus in ejus vita l. 3. cap. 10.

70. Demùm, etsi Confessarius non debeat in hoc gerendo negotio multum commoveri ex admiratione, & opinione vulgi, tamen non eam negligat, ut supra n. 23. indicavit Pontius: unde quando Viri prudentes admirantur in aliquibus frequentiam communionis cautus sit, suspicietur aliquid; nam fortasse Pœnitentes veniunt ad ipsum sub vestimentis Ovium, apud alios verò tales non sunt, apud alios præferunt iracundiam, obstinationem in proprio judicio, amorem suarum commoditatum, fugam laborum, aliasque imperfectiones, quas apud Confessarium quadam externa sensibili devotione, aliquibus suspiriis, & lacrymulis contegunt: quare quando canes latrant, Pastor advigilet, & meminerit 1. illud S. Thomæ 2. 2. q. 49. art. 3. -- *In his quæ ad prudentiam pertinent, maxime indiget homo ab alio erudiri* -- quæcirca concedere

cedere prout oportet rariùs, aut crebriùs communio-
nem Poenitentibus cum sit opus prudentiæ, maximè
indiget Confessarius, ut in multitudine presbytero-
rum, idest, seniorum prudentium stet, & sapientiæ
illorum ex corde conjungatur: 2. deinde meminerit il-
lud S. Philippi Nerii -- *Che nel passare da uno stato cat-
tivo al buono, non ci va consiglio, ma nel passare dal
buono al migliore vi vuol tempo, consiglio, e orazione* --
l. 3. c. 9. Vit. ex Bacci: Non est opus consilio ad sua-
dendum alicui; ut à non frequentia transeat ad fre-
quentiam Sacramenti, sed ad suadendum alicui, ut à
frequentia Sacramenti transeat ad frequentiam mayo-
rem præsertim quotidianam, opus est tempore, con-
silio, & oratione.

Hæc dicta sint ad laudem divinissimi hujus Sacra-
menti, ad uberiores Animarum fructum, & ad Sa-
cerdotum quibus laboro institutionem, quæ omnia,
S. R. E., & Sapientiorum censura, & correctioni
subjicio.

APPENDIX

De Communionem in Viaticum.

CUm pagina hæc superesset vacua post impressio-
nem præsentis Opusculi; instante Typographo
placuit mantissæ loco quætionem satis practicam eno-
dare: An videlicet qui semel Viatico refectus fuit, pos-
sit intra eandem ægritudinem iterum non jejunus
communicare?

R. Afferendo sententiam Eminentissimi Cardina-
lis de Lugo disp. 15. de Sacram. sect. 3. *nec quidquam*
de

de meo addendo : Tantus igitur Author loc. cit. putat id posse fieri subscribendo sententiæ plurium authorum quos ibi allegat ; at quia ejusmodi Authores non conveniunt in determinanda distantia quæ debet intercedere ut possit iterum dari Communio absque jejuniis intra eandem infirmitatem ; Alii enim exigunt octo vel decem dies ut *Suarez* , alii septem vel sex ut *Filiiucci* quem sequitur *Diana* 1. tom. tract. de celebrat. Miss. resol. 77. , alii tertia die dari posse existimant ut *Ludovicus de S. Joanne &c.* Hinc Cardinalis citatus in hac Doctorum varietate dat pro regula firmam & secunda directiva *Praxis consuetudinem Fidelium* & cum jam ipso teste vigeat inter Fideles consuetudo ut iterum detur Eucharistia infirmo non jejuno intra eandem infirmitatem post aliquot dies v. g. septem vel octo ; idcirco judicat id in tali distantia posse fieri : Cum vero *ipsomet Judge* non sit sufficienter à fidelibus approbatus Usus dandi iterum Eucharistiam infirmo non jejuno proxima vel tertia die ; idcirco hoc ipse non approbat : Satis hæc : Vid. de Lugo loc. cit. & la Croix lib. 6. par. 1. de Euchar. n. 613. qui videtur in ea esse opinione quod periculose infirmi sint absolute exempti à præcepto jejunii si commodè non possint manere jejuni ad communicandum : Verum quidquid de ea opinione sit , ex qua ampliatur sententia Cardinalis de Lugo certum est tantam esse necessitatem ejus temporis ut Sacerdotes non multum debeant esse difficiles in accomodando se benigniori sententiæ de iteratione Sancti Viatici .

F I N I S.

DE VENERABILI
EUCCHARISTIA
UT SACRIFICIUM EST.
DISSERTATIO

HABITA

In Congregatione Sacerdotum Sæcularium
in Domo Prof. Rom.

IN QUA DISCUTITUR

*An & quatenus licitum, & conveniens sit Sacerdoti
Missam quotidie celebrare.*

A BROTHER

ANDREA HIERONYMO ANDREUCCI
E SOCIETATE JESU.



ROMÆ, Typis Antonii de Rubeis in via Seminarii Romani,
MDCCXXXIII.

SUPERIORUM PERMISSU.

IMPRIMATUR;

Si videbitur Reverendiss. P. Mag. Sac. Pal. Apostolici :

N. Baccarius Ep. Bojan. Vicesgerens .



IMPRIMATUR.

**Fr. Joachim Pucci Sac. Th. Mag. & Soc. Rm̃i P. Sac. Pal.
Apost. Mag. Ord. Præd.**

De Eucharistia ut Sacrificium est.

§. I.

Proponitur Quæstio.

1.



Ostquam de venerabili Eucharistia ut Sacramentum est, ac de ejus debita Adoratione ejusdemque usu crebrius, aut rariùs Laicis concedendo disseruimus; superest ut de Eucharistia quatenus est Sacrificium aliquid dicamus: Profectò uberrima hic sese offerret disserendi Materies sive instituatur sermo de essentia Incruenti Sacrificii, sive de multiplici fructu qui ab eo dimanat, sive de obligatione Sacerdotum ad illud offerendum, sive de aliis quamplurimis quæ ejusmodi Sacrificii oblationem vel comitantur vel subsequuntur: Nihilominus in tanta rerum copia placuit illud dumtaxat in medium proferre ac diligentius intueri, videlicet: *An & Quatenus licitum & conveniens sit Sacerdoti Missam quotidie celebrare?*

2. Rem hanc cur cæteris præhaberem in causa fuit Propositio quædam insignis Doctoris Martini Bonaccinæ qui de Euch. disp. 4. q. ultima p. 7. n. 17. agens de Capellano electo ad celebrandum quotidie, ait: *Obligatio Missæ quotidianæ imposita Sacerdoti intelligitur salva decentia & honestate, alioquin videretur injungi obligatio ad rem illicitam*: Superiùs autem explicans in quo sita sit hæc Honestas & Decentia addiderat: *Honestas ac Decentia postulat ut aliquando Mis-*

G

sa Sa-

ſæ Sacrum prætermittatur : Ne igitur tanti Authoris commotus ſententia Sacerdotum aliquis Religioni ſibi ducat Miſſam aliquando non prætermittere ; idcirco rem hanc præ cæteris diſſerendam explicandamque ſuſcepi .

3. Verùm antequam rem aggrediar monitos velim Sacerdotes exploratum jam eſſe eos *ratione Ordinis* , & *officii* ſui Sacerdotalis graviter obligari ad Miſſam aliquoties celebrandam niſi rationabilis cauſa excuſet ita *S. Tb. in 3. p. q. 82. art. 10. Suarez diſp. 80. ſect. 1. , Vaſquez diſp. 252. cap. 1. Wieſner de celebr. Miſſ. aliq. , & patet ex Trident. ſeſſ. 22. cap. 1. de Sacrif. Miſſæ* : quamvis verò non ita exploratum ſit *quando* , & *quoties* in anno ad id obſigentur ; videtur tamen rationi conſentaneum eam obligationem procedere in præcipuis feſtis , & maximè in illis diebus in quibus conſueverunt fideles communicare : *ex S. Thom.* Proindè diſſertatio vertetur non circa quamcumque celebrandi frequentiam ; Aliquam enim vel obligatoriam vel maximè ſibi conducentem Sacerdotes pro certo habere debent, undè ajebat Suarez *monendi ſunt ut frequenter celebrent , & ſuadendum contrarium non eſſe in conſcientia ſecurum* : *loc. cit.* Sed tota liſ erit de *frequentia quotidiana* .

4. *Quoad diſſerendi Modum* eâdem incedam via , qua in præcedentibus diſſertationibus : Proponam enim Caſum , ac deinde quæſtionem reſolvam , enodatis quæ contra Poſitionem ipſam adductæ fuerint difficultatibus : Omnia propemodum ex probatiſſimis Theologiſ , ex Eccleſiæ Patribus , ex Sanctorum exemplis depromam . Quidquid verò de meo , ut ajunt , penu protulerim enitar ne à communiõri ac magis

magis recepta Patrum, ac Theologorum sententia discedat.

§ I I.

Proponitur, & resolvitur Casus.

Casus est: Titius Sacerdos ab eo die quo primùm ad aras operatus est nunquam omisit incruenti hujus Sacrificii celebrationem ductus ea qua erat in Deum religione ac pietate: Verùm intelligens id à nonnullis minimè probari, imò a timoratis quibusdam viris Sacrum aliquando prætermitti conscientia motus à Theologo sciscitatus est. An, & quatenus *licet* & *convenienter* Sacerdos quotidie celebret?

R. Supponendo sermonem esse de Sacerdote qui nulla sit censura impeditus, qui sit in statu gratiæ vel si conscius sit peccati mortalis nondum confessi Sacramentalem de eo confessionem præmittat, quique demùm ea habeat extrinseca à sacris Canonibus potissimum instituta ad Sacrificium ritè ac reverenter peragendum v.g. jejunium naturale, vestes sacras &c.

Item supponendo sermonem esse de quotidiana celebratione excludente aliquot dies juxta Ecclesiæ ritum impeditos, non autem de includente eos dies; nam certum est nos prohiberi sub mortali celebrare die Veneris Sancto ut habet Hurtad. de Sacr., Suarez, Vasquez, Tanner alique apud Busemb. & quamvis Diana, Palaus alique probabiliter docuerint posse privatim celebrari Sabbato Sancto, & die Jovis Sancto; ex variis tamen nuperis declarationibus, ac particularibus legibus alicubi saltem id non licet.

Item supponendo non adesse Præceptum ullum Superioris hinc, & nunc ex justis causis prohibentis

alicui sibi subdito sacrificare; nam certe tunc subditus obedire teneretur, ac locum haberet illud *Melior est Obedientia, quam Victimæ*.

His suppositis videtur non esse licitum & conveniens per se loquendo *Celebrare quotidie*: I. Quia Concilia urgendo, & commendando Sacerdotibus frequentiam sacrificandi nunquam expressè commendarunt ut id fieret quotidie, sed vel omnibus diebus dominicis, & festivis solemnibus, ut voluit Concilium Rhotomagensense celebratum anno 1581., vel omnibus diebus solemnibus, & Dominicis, & *sæpius si fieri possit* ut voluit Rhemensis can. 8., vel *ter in Hebdomada ac sæpius* si Sacerdos sit Curatus, ut voluit Aquisgranensis, ac proinde conjectura prona est assequi Concilia non existimasse expedientem usum quotidiani Sacrificii.

II. Quia in Templo S. Sophiæ apud Constantinopolim uti narrat Card. Baronius ad annum Christi 1054. quamvis plurimi adessent Sacerdotes non captum est *Sacrificare quotidie* usque ad eum annum; unde inferre possumus apud Græcos per plura sæcula non viguisse Praxim celebrandi quotidie nec respectivè ad Sacerdotes singulares, nec respectivè ad integras Ecclesiasticas Communitates: Imò teste Raynaldo tom. 16. Apud Latinos plerique olim Religiosi sibi ducebant *celebrare quotidie*: unde &c.

III. Quia apud Religiosas quasdam familias puta apud Carthusianos teste Petro Blesensi usus olim viguit non celebrandi quotidie; imò citatus Author in epist. 86. agens cum Alexandro Carthusiano qui nutabat in sua vocatione ex eo quod non poterat quotidie celebrare negat eam quotidianam sacrificeationem esse
Reli-

Religionem , vocat verò superstitionem , multisque argumentis ductis ex periculo non dijudicandi Corpus Domini , & ex summa munditie ad sacrificii celebrationem requisita confirmat non esse quotidie celebrandum , ac jurè eam Praxim viguisse apud Carthusianos .

IV. Quia S. Franciscus de Assisio videtur fuisse in hac sententia quòd minimè conveniret Sacerdotibus quotidiana celebratio liquidem in epist. 12. ad Sacerdotes totius Ordinis sic habet : *Monco præterea , & exhortor in Domino , ut in locis in quibus morantur Fratres una tantùm celebretur Missa in die secundum formam S. Rom. Ecclesiæ : Si verò in loco plures fuerint Sacerdotes , sic sit per amorem Charitatis alter contentus audita celebratione Sacerdotis alterius &c.*

V. Quia Theologi Morales admittunt Capellanium obligatum celebrare *quotidie* posse semel in Hebdomada vacare ob reverentiam debitam tanto Sacramento seù ut ipsi ajunt *ob honestatem , & decentiam* : ita Gavant. de Rub. Mis. part. 3. tit. 12. num. 17. , Bonacc. , Tamburinus , Toletus aliique apud ipsos videndi , ergo juxta hos DD. minus conveniens est quotidiani sacrificii usus .

VI. Demum quia nos in opusculo præcedenti diximus regulariter non esse concedendam Laicis Eucharistiam plus quam bis aut semel in Hebdomada : Cum autem non solum eadem sed major etiam requiratur in Sacerdote dispositio ad Sacrificium ; sequitur si coherentè loqui velimus &c.

Nihilominus Ajo *Per se loquendo* licitum ac maxime conveniens esse Sacerdoti quotidie celebrare , *Per accidens* verò in aliquo raro casu posse esse aliquando

Reli-

Religiosum, aliquando etiam *Obligatorium* eidem Sacerdoti unum vel alterum diem aut etiam ulterius juxta prudentis Confessarii consilium à Sacrificando abstinere.

Probo hoc per partes : Et primò quidem quòd *per se loquendo* licitum ac maximè conveniens sit Sacerdoti quotidie celebrare suadetur tum praxi SS. Virorum, tum sententia PP. ac DD., tum ratione ipsa ex utilitate tanti sacrificii : Suadetur *Praxi SS. Virorum* nam à primis nascentis Ecclesiæ sæculis usus invaluit apud pios Sacerdotes celebrandi quotidie : S. Andreas Apostolus testatus est de se ipso *Ego omnipotenti Deo qui unus & verus est immolo quotidie*. De S. Petro hoc affirmat Simon antiquus Author Græcus apud Turrian. lib. 8. de dogm. Car. Idem factum à S. Cassio Narniensi Episcopo narrat cum laude S. Greg. 3. dialog. c. 6. S. Basilium quotidie sacrum fecisse commemorat Amphilochius in ejus vita cap. 6. Hoc idem affirmat S. Dionysius de S. Carpo in epist. 1. ad Demophylum, & S. ipse Dionysius ne in carcere quidem à Sacrificio abstinere ut testatur in ejus Vita Halduinus. Tribuit item S. Ambrosio quotidianam Missæ celebrationem Baronius : Item scriptor Vitæ S. Laurentii Justiniani ait Sanctum virum etiam valdè proventum ætate quotidie sacrificasse imò arguere solitum, refert eos Sacerdotes qui secluso gravi impedimento quotidianum Sacrificium omitterent : De S. Francisco Borgia Soc. Jes. legitur in lectionibus Breviarii *Nunquam à sacrificando abstinuit* : De S. Cajetano Thienzo memoriæ proditum est se Neapoli olim Romam contulisse ad hunc dumtaxat finem ut Prælatum quemdam de non omittendo quotidiano Sacro commone-

face-

faceret : unde talem fuisse Praxim plurium SS. Virorum variis ac diversis temporibus certum est . Accedit etiam plures Religiosas domos ex instituto & ex approbatis Regulis habere id in usu : Accedit id olim in usu fuisse apud Monachos siquidem Cassianus l.6. de Spir. forn. cap. 8. approbat Monachorum suæ ætatis quotidie sacrificantium consuetudinem : Quamobrem *ex praxi* constat quotidianum sacrificium licitum *per se*, & *expediens* esse .

Suadetur idipsum ex *Sententia PP. & DD.* nam tritum est illud Venerabilis Bedæ : Sacerdos non legitime impeditus celebrare omittens quantum in eo est privat S. Trinitatem laude , & gloria , Angelos lætitia , Peccatores venia , Justos subsidio , & gratia , in Purgatorio existentes refrigerio , Ecclesiam spirituali Christi Beneficio , se ipsum medicina & remedio : Insuper S. Hieronymus l. 3. adversus Pelag. vocat Missam *quotidianum Corporis Christi sacrificium* , quod idcirco dictum existimat Gonzalez quia congruum censebat S. Doctor tantum Sacrificium quotidie peragi à Sacerdotibus . Imò DD. quidam Canonistæ ut refert Arch. apud Sylvestrum *V. Missa* q. 7. docent peccare mortaliter eum Sacerdotem qui ex negligentia omitteret quotidie celebrare innixi dicto B. Ambrosii , scilicet *Ego quia quotidie pecco , quotidie debeo accipere Medicinam : de Conf. dist. 2. si quoties* : Tandem eximius Suarez disp. 80. sect. 2. tom. 3. in. 3. partem aperte asserit *Per se loquendo , & seclusa speciali prohibitione Ecclesie non solum est licitum Sacerdoti quotidie sacrificare , verum etiam ex se melius est magisque consulendum* : Unde ex doct. PP. & DD. per se licitum & conveniens est quotidie sacrificare .

Sua-

Suadetur idipsum *Ratione*; Nam quotidie sacrificare non esse per se illicitum constat ex eo quod id non sit ex natura sua malum sed bonum, neque sit aliquo jure positivo prohibitum: Idem verò esse expediens ac conveniens constat ex eo quod honor maximus per sacrificium incruentum exhibetur Deo, ac Fructus uberrimus non in solum dumtaxat sacrificantem, sed in universum etiam Orbem terrarum inde redundat ut infra videbimus.

Probo jam alteram Assertionis partem: Nempè *Per accidens* in aliquo raro casu posse esse *Religiosum* abstinere à quotidiano *Sacro peragendo*: Nam Timor aliquis Reverentialis, ut rectè notat Suarez tom. 1. de Rel. l. 3. cap. 2. n. 5. potest esse actus elicitus à Religione v.g. Timor de eo ne quis deficiat in debito cultu Dei: Hinc est quod si quis timeat ob urgentem & gravem aliquam occupationem ne *irreverenter & indevote Missam* celebret sicque deficiat à debito cultu Dei, & idcirco Missæ celebrationem omittat eliciet actum Religionis: Unde citatus Suarez loc. cit. expressè docet quòd aliquando *abstinere à frequentia Communionis possit esse actus Religionis & ab ea elicitus, sicut odisse Irreverentiam Dei*: Verùm sedulò cavendum est ne sub specie, ac prætextu nolendi deficere à debito cultu Dei per irreverentiam, studeamus commoditati propriæ qua nolumus à curis temporalibus recedere, ac paulisper in nosmetipsos nos colligere ut Deo vacemus & Sacrum debitè peragamus: Propterea Consilium prudentis Confessarii ad id postulandum, & exquirendum erit in casu aliquo occurrente ne vanus sit ac palliatus noster Timor: Accepimus in Historiis S. Petrum Cælestinum per quinquennium à sa-
c rifi-

crificando abstinuisse eò quod reformidaret (uti refert Petrus de Amiario l. 1. vitæ cap. 7.) tractare tanti Mysterii Sacramentum sed prodigiòse fuisse errorem, dedotum . Nam de nocte venit ad eum in visione quidam Abbas nuper defunctus quique illi habitum Religiosum contulerat ; Is illi Missam *cum timore & tremore* dicere persuasit , ac statim disparuit . Ex quo deprehendes rarum esse Casum in quo *religiosè* à sacrificando abstineas :

Demum Probo 3. Assertionis partem scilicet : Aliquando *esse obligatorium* à quotidiano Sacrificio abstinere : Nam si quis Sacerdos (quod Deus avertat) paulò ante v. g. nocte aut die præcedenti peccaverit , præsertim peccato carnali externo , tunc ille etiamsi pœniteat , & confessus sit *regulariter* non evitabit veniale peccatum accedendo ad sacrificandum die subsequenti : Ita Card. de Lugo de Euch. disp. 15. sect. 1. ubi sic habet loquens de talibus Peccantibus ac deinde Pœnitentibus : *His quidem regulariter expedit injungere ut ea die qua culpabiliter polluti sunt (quod idem de copula illicita intelligitur) abstineant ; vix enim accedere possunt absque irreverentia , quæ sit culpa venialis , nisi fortè ratio specialis dicat esse accedendum &c.* & infra addit *Rarè permittendus videtur aliquis celebrare eadem die post Copulam illicitam , licèt Confessionem præmiserit* : Undè quamvis ad celebrandum non præquiratur quod quis *condignam de delictis suis pœnitentiam egerit* sicuti constat ex prop. 22. damnata ab Alex. VIII. , nec præquiratur *Amor purissimus* sicuti pariter constat ex prop. 23. ab eodem Pontifice damnata ; tamen ex lege naturali saltem leviter obligante præquiratur *regulariter* ne quis eadem

dem die aut die immediatè antecedenti peccaverit peccato præsertim carnali externo : Qua in re non facile audiendi sunt allegantes , & obtendentes necessitatem celebrandi vel propter Capellaniam , vel propter Indigentiam eleemosinæ ; siquidem oneri Capellaniæ ipsi possunt vel per alium satisfacere vel possunt juxta multorum sententiam semel in Hebdomada vacare ac tunc vacent : Indigentia verò eleemosinæ unius vel alterius dici rarò erit tanta ut præhabenda sit ejusmodi reverentiæ debitæ tanto Sacramento : Profectò olim Sacri Canones , uti habetur cap. *Presbyter dist. 82.* non nisi post annum & dimidium gravis Pœnitentiæ permittebant ut Sacerdos in fornicationem lapsus Particeps fieret Corporis , & Sanguinis Domini , nunc autem non ne esset detestabilis inconvenientia si quis , ut Sancti Bernardi verbis utar , *auderet intingere in Sanguine Salvatoris carnes nefarias quibus paulo ante (proh dolor !) carnes meretricias attraxerat ?*

Stat igitur *Per se loquendo* licitum , & conveniens esse quotidie celebrare , *Per accidens* verò aliquando *Religiosum* , aliquando etiam *obligatorium* esse à quotidiana celebratione abstinere .

Neque obstant rationes in contrarium supra adductæ : Non prima , nam ex eo quod Concilia urgendo & commendando frequentiam sacrificandi non expresserint ut id fieret *quotidiè* à singulis Sacerd. nequaquam deducitur quotidianum Sacrificium non esse magis conveniens , sed non esse obligatorium stando in jure divino , ac jure positivo communi , & insuper esse onus satis grave respectu omnium : *deducitur* igitur non esse *obligatorium* quia certè id expressissent , & propterea conveniunt Theologi apud Suarez de Sacr. disp. 80. sect. 2. non esse

esse obligatos singulos Sacerdotes ad quotidianum Sacrificium, quare si id ipsi non præstent relinquunt quidem quod *per se* est perfectius, sed non delinquant: item *deducitur* Quotidianum Sacrificium esse onus satis grave respectu omnium & idcirco Concilia legem, dum ferrent pro tota communitate ejusmodi frequentiam non præscripserunt siquidem lex humana debet esse de re moraliter possibili nisi commune bonum aliud exigit: Hinc DD. quamplures ajunt quod sicubi adesset obligatio celebrandi quotidie ea intelligenda sit *moraliter*, & *regulariter* quia aliàs esset onus intolerabile: ex Bonacc. de Euch. disp. 4. q. ult. p. 7. Tambur. de Sacr. lib. 3. cap. 3. aliisque: Dixi nequaquam deduci quotidianum Sacrificium non esse magis conveniens, nam ex eo quod legislator aliquid non præscribat nequaquam infertur illud non esse *per se*, magis conveniens: de facto S. Paulus *de Virginitate*, inquit, *præceptum Domini non habeo*, & tamen ipse Matrimonio Virginitatem præfert.

Ad 2. Esto ita invaluerit usus in eo augustissimo Templo Constantinopolitano propter aliquas circumstantias fortasse talem usum exigentes, certè apud Græcos quotidianum Sacrificium in more positum legimus; nam S. Joann. Chrysostomus hom. 5. in epist. ad Ephes. scribit quotidianam oblationem suo tempore fieri solitam; unde ex ea historia solùm confirmatur Theologorum sententia asserentium stando in jure Divino, non esse singulis Ecclesiis præceptum quotidianum Sacrificium: quanquam hodie ex jure positivo communi doceant in singulis Ecclesiis Cathedralibus Parochialibus, & Conventualibus debere quotidie Sacrificium Missæ offerri si conveniens sit seu medio-

cris Sacerdotum numerus : ita DD. ex cap. *Cum Creatura de celebrat. Miss.* Quod vero addebatur de Latinis quibusdam religioni sibi ducentibus quotidianum Sacrificium non facit contra nos ; nam cum nesciamus quinam isti fuerint , qua doctrina , & quibus occupationibus ; dictamen conscientiae quod sibi ipsi efformaverant non potest nobis pro regula ad operandum inservire .

Ad 3. Carthusianorum quos adducit Blesensis vetus illi usus postea correctus est 2.p. Statutorum cap. 7. & idem insinuat in antiqua collatione Statutorum cap. 1. ut advertit Busæus ad epist. 86. Blesensis : Quæ vero Petrus Blesensis contra quotidianum Sacrificium protulerit nequaquam sunt attendenda *per se* , & *universaliter* ; nam intendebat ipse in suscepto vitæ consilio confirmare eum Carthusianum ; undè ab uno extremo in quo tentabatur ille Novitius , visus est ipse in alterum dicendo , & exaggerando vergere more Patrum , qui unam Hæresim impugnantes ad oppositam videntur aliquando accedere .

Ad 4. Quoad S. Francisci de Assisio epistolam , respondet Joannes Eckius epistolam illam non agnosci à Fratribus Ordinis Minor. pro vera S. Francisci epistola : Wadinghus autem ad eum locum ait S. Patriarcham agere tantum de Missa conventuali : Placet responsio Raynaudi ingenuè fatentis S. Franciscum pro ea qua erat Christiana Humilitate sicuti ea ductus virtute noluit sibi Sacerdotium , ita eadem timuisse ne plerique suorum minimè essent comparati ad quotidie Sacrificandum ac propterea &c.

Ad 5. Fateor Theologos quamplures docere Capellanum obligatum toto anno Missas quotidie celebrare ,

brare , eum posse intermittere seu vacare semel in Hebdomada ; at nego rationem eam esse quam ex iis nonnulli adducunt scilicet *ne faciant rem illicitam* , sed Ratio est quia celebrare toto anno sine ulla intermissione onus nimis grave est quod imponere Fundator minimè præsumitur cum tale onus redundet semper in Sacerdotem , *directè* quidem si ipse sit electus , *indirectè* si electus sit locus ut in eo à sacerdote celebretur ; semper enim celebratio quotidiana Sacerdoti incumbet : Cæterum puto Bonaccinam aliosque fuisse , usos ea ratione *de illicito* non quod putaverint quotidianum Sacrum rem esse *per se illicitam* , sed quod putarint attenta fragilitate humana *per accidens* in plebisque propter indispositionem fieri illicitam .

Ad 6. optimè respondet P. Suarez cujus verba , exscribam : *Licet Laicis regulariter non sit consulendum ut quotidie communicent , Sacerdotibus autem consulendum est ut quotidie sacrificent* : Est enim id *per se loquendo melius* : Nam Munus sacrificandi non est *privatum sed publicum* , nec prodest soli sacrificanti sed toti Ecclesiæ , & idè dummodo indignus non sit , & moralem ac humanam diligentiam adhibeat , quomvis sit imperfectus , non debet ab hoc munere cessare : Accedit etiam quod cum sit specialiter ad hoc Munus consecratus & habet proprium ac peculiare jus ad offerendum ; & habet paratum speciale divinum auxilium ut sanctè conficiat : Per hoc tamen non intendimus negare , quo minus ex reverentia , & timore aliquo die interdum hoc munus intermittere possit esse , & bonum , & utile , & alicui fortassè consulendum juxta diversas Personarum conditiones , & varias Spiritus Sancti divisiones gratiarum . Hactenus Suarez disp. 80. sect. 2. de Sacr.

Sacr. ex quibus habes disparitatem Laicos inter & Sacerdotes : Hæc autem Suarezii disparitas magis apparebit ex sect. sequenti .

§ I I I.

*Ad quid datum sit nobis hoc
Sacrificium?*

UT planè sibi persuasum habeant Sacerdotes *esse per se loquendo* melius ut ipsi quotidie sacrificent, quamvis non sit *regulariter* Laicis consulendum ut ipsi quotidie communicent, ut aiebat Suarez, imò ut docet Vasquez disp. 232. non eam ex necessitate in Sacerdote ad celebrandum *quotidie* requiri Sanctitatem, quam ad communicandum *quotidie* aut *bis in Hebdomada* in Laicis requirimus; Ut inquam id sibi Sacerdotes persuasum habeant, ac propterea frequenter celebrent illud intelligant oportet quod citati Doctores rectè expendebant, scilicet, *Sacerdoti convenire munus sacrificandi non tantum in suam sed etiam in Populi utilitatem*, quæ quanta sit pronum erit dignoscere investigando *Ad quid datum sit nobis hoc Sacrificium?* de quo statim.

Diùs æque ac doctus Vir P. Leonardus Lessius in lib. 12. de perfectionibus divinis censet datum esse hoc Sacrificium potissimum ad quatuor, & primò quidem ad dignitatem Religionis Christianæ. *Cum enim hæc Religio sit eminentissima*, inquit ipse, *decuit etiam illam ornari, vel potius perfici eminentissimo Sacrificio*: Et quidem eminentissimo Sacrificio de facto ornatur siquidem Missa, & est Sacrificium, & maximam quam-

quamdam habet excellentiam & dignitatem : *Est Sacrificium* nam in consecratione Eucharistiæ verum, & proprium Sacrificium offerri docuit Trid. sess. 2. cap. 1. & 2. & can. 1. Aliàs Ecclesia Catholica nullum haberet Sacrificium, siquidem nec oves nec boves in Sacrificium offert, neque sub hac ratione incensum adolet, sed ut Deum adoret, & Excellentiam illius recognoscat : Accedit quòd Sancta illa Hostia quæ in Missa offertur; ea ratione offertur ut protestemur supremum Dei dominium in mortem & vitam nostram, & summum ac supremum cultum illi tanquam primò principio & supremo fini nostro exhibeamus. *Maximam, quamdam habet excellentiam;* nam res in eo oblata est infinitæ dignitatis siquidem Deo offertur ipse Christus Dominus sub speciebus panis & vini: Modus offerendi *in se, & quoad substantiam suam;* ut sic dicam, est maximè supernaturalis & divinus; nam offertur illa sacrosancta Hostia, quando vi verborum Consecrationis Corpus & Sanguis Christi ponuntur seorsim tanquam, rei occisæ & immolatæ, Corpus sub specie panis & Sanguis sub specie vini: *quoad sensibilem vero actionem* est simplicissimus, mundissimus, & facillimus: offerentes autem licèt sint Sacerdotes tanquam Christi ministri; tamen præcipuus ac principalis offerens est ipsemet Christus tum quia ipse Sacrificium hoc instituit, illique virtutem & efficaciam suis meritis concessit, tum quia credibile est eum singula Sacrificia dum actu fiunt Patri suo offerre actu elicito, ut notat Suarez disp. 77. sect. 1. alique: Hinc prima ratio Sacrificii cum sit adtribuendum Deo honorem illi proportionatum quantum homo potest, sequitur hanc rationem in hoc Sacrificio cumulatissimè reperiri;

nam

nam ut rectè expendit Suarez *Ad hunc finem aptissima sunt omnia quæ in hoc Sacrificio interveniunt præsertim Principalis offerens, Res oblata, & Modus offerendi.* Undè non est mirum quod omnia vetera Sacrificia abolita sint post institutionem hujus in lege nova; nam ut rectè ait S. Leo serm. 8. de pass. Domini: *Nunc carnalium Sacrificiorum varietate cessante, omnes differentias hostiarum una Corporis, & Sanguinis tul implet oblatio:* Viderint proindè Sacerdotes ne tantum Sacrificium offerre negligant obtendentes indispositionem sed re vera laborem sese disponendi reformidantes.

II. Datum est hoc Sacrificium *Ad gratiarum actionem* ut habeamus quo dignas Deo gratias perpetuò agamus pro ingentibus ipsius in nos beneficiis maxime Redemptionis: ex Less. ibid. & traditum est à Trident. sess. 22. cap. 2. Hinc Irenæus l. 4. cont. Hæreses cap. 32. expressè dicit instituisse Christum hujus Sacrificii oblationem *ne nos ingrati esse Deo videremur:* Et sanè innumera ac maxima sunt Beneficia quibus nos Deus obstrinxit: At nulla potest esse Major ac præstantior gratiarum Actio quam quæ hujus Sacrificii oblatione perficitur: Nam ad gratiarum actionem hæc potissimum pertinent 1. quod Homo acceptum beneficium commemoret & recognoscat: 2. quod retribuat loco & tempore secundum suam facultatem: At quæso vos qua re alia magnitudinem beneficiorum Dei magis commemorare, ac cognoscere possumus quàm hoc Missæ Sacrificio quo testamur ipsum esse auctorem Redemptionis, & Salutis nostræ, ipsum misisse filium in carnem ad nos salvandos, & bonis omnibus cumulandos, ipsius voluntate pro nobis mortem suscepisse;
Ipsam

Ipsam denique Mortem filii commemoramus & veluti ob oculos ponimus? Rursum quid præstantius, aut gratius offerre Deo possumus pro acceptis beneficiis, quam Hostiam hanc immaculatam ipsum Dei Filium Unigenitum? Enimvero opportunus in hanc rem detorque- rem verba David in Psalm. 115. Cum nihil habeam, præstantius quod offeram Deo meo, inquit ipse, pro tam multis bonis quæ retribuit mihi *Calicem salutaris accipiam*: Scio hunc locum magno Patrum consensu intelligi de Calice patientiæ, & Tribulationis, sed rectè iis verbis utar, & rectè verborum sententiam exponam de hoc admirabili Sacrificio; Cum nihil habeam præstantius quod Deo retribuam *Calicem salutaris accipiam*, & nomen Domini invocabo.

III. Datum est ad *Peccatorum propitiationem*: nam Trident. sess. 22. can. 2. apertè docuit hoc Sacrificium non solum propitiatorium esse pro pœnis, sed etiam pro culpis, nec solum pro culpis levibus, sed etiam pro gravibus: Hinc S. Cyprianus in serm. de Cœna Dom. dicit Eucharistiam esse Holocaustum ad purgandas iniquitates: S. Ambrosius l. 1. de officiis cap. 48. de Eucharistia loquens *Offert*, inquit, *Christus se ipsum quasi Sacerdos, ut peccata nostra dimittat*. At sciscita- beris quomodo & qua ratione hoc Sacrificium peccata dimittat? R. communem sententiam esse hoc Sacrifi- cium non habere vim remittendi peccatum mortale in- star Sacramenti ita ut in eo qui sola attritione disposi- tus est, mortale peccatum deleat sicut Sacramentum Pœnitentiæ: deinde neque vim habere hoc modo re- mittendi venialia, aut conferendi gratiæ, & justifi- cationis augmentum, sed tantum vim habere impe- trandi auxilium gratiæ quo & justificari à peccatis

mortalibus, & venialibus, & in justificatione sua Homo crescere possit: Undè Trid. sess. 22. c. 1. docuit *Hujus oblatione placatus Dominus Gratiā* (excitantem) & *donum Pœnitentiæ concedens crimina, & peccata etiam ingentia dimittit*: Non igitur intelligendum est hoc Sacrificium *immediatè* per se delere peccata, sed *mediatè* quatenus scilicet impetrat veram illorum contritionem & inspirationem ad rectè poenitendum *specialiter* de peccatis cognitis, *generaliter* de oblitis vel ignotis: Quandoque verò hic Spiritus Pœnitentiæ datur tempore Sacrificii quod pro aliquo Peccatore offertur, quandoque alio tempore opportuno prout Deus providet, *intuitu* tamen *Sacrificii*: Sic multi post multa crimina convertuntur speciali auxilio Dei, & nesciunt virtute Sacrificii Missæ impetrantis tale auxilium id fieri: Quandoque aliqui non convertuntur, quia auxiliis à Deo datis non cooperantur, sed abutuntur.

Præterea hoc Sacrificium dicitur *peccata dimittere* quia remissa culpa & pœna æterna per Sacramenta, & etiam culpis venialibus deletis sæpe ingens debitum pœnæ temporalis restat luendum; Ad hoc autem debitum exolvendum confert quāmaximè hoc Sacrificium; applicat enim satisfactionem Christi uti habet Trident. sess. 22. c. 17 & 2. Hinc de Petro quodam pio Juvene qui Missis interesse, ac ministrare consueverat narrat Cæsarius l. 8. mir. c. 13. *Quadam etiam vice cum ministraturus Missæ Domini Caroli Abbatis quondam Vilarienfis confessionem dixisset, & absolutionem devotius acciperet audivit vocem de Cælo dicentem sibi: Dimissa sunt omnia peccata tua: Caveant proinde Sacerdotes ne per negligentiam ac socordiam celebrare omit-*
tentes

tentes seipsos, aliosque privent beneficio tam grandi Remissionis peccatorum.

Demum IV. datum est hoc Sacrificium ad *Impetrationem* omnis generis beneficiorum etiam *temporalium* quatenus saluti conducunt: Si enim inquit Lessius precibus Sanctorum ea saepe obtineri possunt, quanto magis hoc Sacrificio in quo id quod prae omnibus Sanctis Deo est acceptius, & ipse fons Sanctitatis cum omnibus suis meritis offertur? Hinc Liturgiae omnes Jacobi, Clementis, Basilii, Chrysostomi non semel inter sacrificandum, orandum praecipunt pro pace, pro copia fructuum, & pro aliis id genus temporalibus beneficiis: Ac de facto plura à Deo per hoc Sacrificium impetrata esse Sacrae testantur Historiae: S. Prosper lib. de praedictionibus Dei scribit suo tempore oblatum fuisse Sacrificium Missae pro Damoniaca, atque eam à Dæmonis vexatione fuisse liberatam. S. Gregorius hom. 37. in Evang., & Beda 4. lib. Hist. Angliae scribunt diversis temporibus idem Miraculum contigisse ut cum Sacrificium Missae offerretur pro homine captivo in alia regione posito, & ignorante quid pro se fieret, ejus vincula divinitus solverentur ipsa hora Sacrificii: Cum itaque innumera nos circumstent in hoc exilio Mala, cum plurimis indigeamus bonis incuria esset acriter reprehendenda hoc Sacrificium, omittere quo illa possumus avertere, hæc verò nobis aliisque comparare.

Stet igitur illud simplices Sacerdotes etsi nulla lege ad quotidianam celebrationem astringantur, nihilominus id maximè eos decere tum ob Dei cultum & honorem, tum ob Ecclesiae fructum, tum ob cujusque utilitatem privatam ac publicam, temporalem ac

spiritualem : Quamobrem sibi incumbere Sacerdotes intelligant ita vitam moresque componere ut quotidie merito celebrare possint , ad idque conducet tum sapius in Hebdomada confiteri , tum singulis diebus aliquid spatii rerum cœlestium contemplationi tribuere : Profectò indispositionem ad tantum Sacrificium frustra excusaverint , si dispositionem ultrò ipsi neglexerint . Audiant ex Baronio tom. 12. qua ratione ad quotidianum Sacrificium se compararet spectatissimus Vir Matthæus Cardinalis Episcopus Albanensis : *Servabat in Palatio Instituta Claustri , & Mundo expositus firmo & longo usu , velut innato religionis proposito à secularibus vanitatibus se quasi septo firmissimo secernebat ; cohibebat se intra se , nunquam (sicut de quodam dictum est) magis solus quam cum aliis , nunquam magis negotiosus quam cum solus erat : Præferebat cunctis operibus suis , omnibusque sanctis studiis Sacrificandi Deo illam suum quotidianum usum , à quo nec rei familiaris cura , nec multiplex occupatio , nec ipsa continua post Summum Pontificem omnium Ecclesiarum sibi imposita sollicitudo eum retrahere poterat .*

Utinam pium hoc Exemplar imitantes nos Sacerdotes , & Sacrificium frequentemus , & debitam ad Sacrificium dispositionem afferamus .

F I N I S .

DIS-

DISSERTATIO II.

D E U <u>s</u> u Eucharistiae crebrius aut variis Laicis concedendo .	5.
<i>Proponitur Decretum Sacrae Congregationis Concilii de Communionem quotidianam .</i>	7.
<i>Adnotationes circa leges talis Decreti .</i>	10.
<i>Casus de concedente indifferenter Personis Laicis communionem quotidianam .</i>	14.
<i>An talis Praxis sit obnoxia Hallucinationi .</i>	ibid. & seq.
<i>Scholasticorum sententia in hac re .</i>	17.
<i>Moralistarum sententia .</i>	20.
<i>Mythicorum sententia .</i>	22.
<i>Sanctorum Praxis in hac re .</i>	25.
<i>Fundamenta contraria evelluntur .</i>	30.
<i>Refelluntur duae replicae opinionis contrariae .</i>	37.
<i>Proponuntur Regulae morales servandae à Confessario in concedendo crebrius aut variis Sacram Communionem .</i>	19. & seq.
<i>Unde cognoscet Confessarius finem sincerum & non vitiosum petentium Communionem quotidianam .</i>	41.
<i>Unde intelliget Confessarius an aliquis ex frequentia Eucharistiae fructum capias .</i>	43.
<i>Non semper contemnenda Admiratio Vulgi .</i>	44.
<i>An qui semel Viatico refectus fuit possit intra eandem agritudinem iterum non jejunus communicare .</i>	45.

DISSERTATIO III.

P roponitur quæstio an & quatenus licitum & conveniens sit Sacerdoti . Missam quotidie celebrare .	49.
Occasio talis Dissertationis .	ibid.
An teneantur Sacerdotes ex vi ordinis aliquando in onuo cele- brare .	50.
Casus de Sacerdote quosidie celebrante , ac Religioni id sibi du- cente .	51.
Celebrare quotidie est per se magis expediens & consulendum .	53.
Aliquando est Religiosum , aliquando Obligatorium intermis- tere quotidianam celebrationem .	56.
Refelluntur objectiones in contrarium .	58.
Capellani obligati celebrare quotidie an & cur possint aliquando vacare .	60.
Disparitas allata à Suarez circa Laicorum quotidianam Commu- nionem , & Sacerdosum quotidianum Sacrificium .	61.
Ad quem finem datum sit nobis Sacrificium Missæ .	62.
Quomodo illud nobis remittat Peccata .	65.
Disponere se debent Sacerdotes ad quotidianam celebrationem	67.
Quomodo se disposuerint pii Sacerdotes .	68.

005647075

